

DISCOVERS

DES RAISONS ET

MOYENS, POUR LESQUELS
Messieurs du Clergé, assemblez en la
ville de Chartres, ont déclaré les Bul-
les Monitoriales, decernees par Gre-
goire XIII. contre les Ecclesiasti-
ques & autres, tant de la Noblesse que
du tiers Estat, qui sont demeurez en la
fidelité du Roy, nulles & iniustes.



A T O U R S,

Chez I A M E T M E T T A Y E R, Impri-
meur ordinaire du Roy.

M. D. X C I.



Digitized by the Internet Archive
in 2010 with funding from
University of Toronto

DISCOVRS

DES RAISONS ET

MOYENS, POVR LESQUELS

Messieurs du Clergé, assemblez en la
ville de Chartres, ont declaré les Bul-
les Monitoriales, decernees par Gre-
goire XIII. contre les Ecclesiasti-
ques & autres, tant de la Noblesse que
du tiers Estat, qui sont demeurez en la
fidelité du Roy, nulles & iniustes.



A T O V R S,

Chez I A M E T M E T T A Y E R, Impri-
meur ordinaire du Roy.

M. D. X C I.



DISCOVRS DES RAISONS

& moyens, pour lesquels Messieurs du Clergé assemblez en la ville de Chartres, ont declaré les Bulles Monitoriales decernees par Gregoire X I I I I. cõtre les Ecclesiastiques & autres, tant de la Noblesse, que du tiers Estat, qui sont demeurez en la fidelité du Roy, nulles & iniustes.

Voulant deduire sommairement, les principaux moyens & raisons, que j'ay appris auoir meu Messieurs du Clergé, assemblez n'agueres en la ville de Chartres, à declarer les Bulles decernees par Gregoire X I I I I. tant contre les Prelats & autres Ecclesiastiques, que contre les Princes, Gentils-hommes, & autres du tiers Estat, qui ne voudroient se departir de l'obeissance de nostre Roy Henry I I I I. à present regnant, nulles, iniustes & suggerees par les ennemis de cest Estat. Je ne doute point que ie ne sois

calomnié, non seulement par les rebelles & ennemis publics : desquels ie ne me soucie aucunemēt, mais aussi par aucuns de ceux, qui faisans demonstration & apparence, d'estre demeurez en la fidelité qu'ils doiuent à leur Prince naturel, nourrissent & preparent secrettement en leur cœur, la diuision contre leur Prince & l'Estat. Et peut estre aucuns de mesdits Sieurs du Clergé, trouueront mauuais que i'aye entrepris de diuulguer les raisons qu'ils ont voulu tenir secretes, & margüeront comme ayant esté mal instruiet, d'y auoir, peut estre, adiousté, & parauenture diminué. Et apres cela me tiendront pour temeraire, d'auoir mis en auāt ce que le tēps deuoit meurir & produire: Mais le zele que ie porte au public, au biē de cest Estat & Corōne, au seruice du Roy, au contentement de tous les gēs de bien, m'ont fait reduire par escript ce qui m'a semblé ne deuoir estre celé ny retardé, quoy que le iugement des plus sages l'ait autrement estimé. Mais comme les opinions des hommes sont differentes, & les vns se hastent de recueillir l'uti-

lité & contentement des choses presentes : les autres pour les differer esperans mieux, en perdent quelquefois le fruit, ie laisseray le iugemēt de ces deux partiz aux lecteurs de cet escript, pour estre des vns louē en ce mien zele, à la charge d'estre blasmé des autres, & en souffrir le blasme à l'occasion d'un si bon oeuvre.

Or pour entrer en matiere, il faut presupposer que Gregoire XIII. induit & persuadé par les seruiteurs & partisans du Roy d'Espagne, par les brigues & factiōs duquel il a esté esleu Pape, a enuoyé Mar-filius Landrianus son Nunce en France, vers les ennemis rebelles & cōspirateurs cōtre cet Estat, pour y publier deux Bulles en forme de suspension, excommunication & monition: l'une contre les Euesques & autres Ecclesiastiques: l'autre cōtre la noblesse & tiers Estat de ce Royaume, qui adhereroient à Henry III. à present regnant, & qui le recognoistroiēt pour Roy : presupposant que par autre Bulle donnee en l'an 1585. par le feu Pape Sixte V. il auroit esté declaré excommunié, heretique & relaps, & comme tel.

auroit esté priué, tant du Royaume de Nauarre, que de tous autres qui luy pourroient escheoir par cy apres. Puis donc que ces deux Bulles dernieres se referent à celle de Sixte V. il me semble n'estre hors de propos, de discourir par mesme moyen, des nullitez de toutes lescdites Bulles.

Pour iuger de toutes actions, si elles sont bonnes ou mauuaises, il faut les considerer, ou des personnes qui les font, ou de ceux à l'occasion desquels elles sont faites, ou bien par elles en foy. Or si nous voulons esplucher par ordre ces trois poincts, nous trouuerons que toutes ces Bulles sont pleines de nullitez & d'iniustice.

Pour le regard de ceux qui les ont decernees, il est certain qu'ils ne l'ont peu faire, soit qu'on considere leurs personnes particulieres, soit leur dignité Papalle. Car quant à leurs personnes, ie ne m'amuseray point à ce qu'on a voulu reuoquer en doute leurs qualitez de Papes, ayans volontairement quitté le tiltre de peres communs enuers la France, ny à ce

que les autres disent qu'ils sont indignes de ceste belle qualité, pour leur notoire heresie condamnée par le Concile de Constance, ayans voulu exciter, voire contraindre les subiets à se rebeller contre leur Roy, mesmes le feu Pape Sixte, qui s'est rendu fauteur des subiets rebelles, à l'encontre du feu Roy, Prince tres-catholique : mais seulement ie diray qu'ils n'ont peu estre iuges de nostre Roy & de nous, pour s'estre renduz partiaux & adherās des ennemis de cet Estat, pour s'estre vniz, alliez & liguez avec ceux de la maison d'Espagne, de Sauoye & de Lorraine, auoir ietté leurs malheureuses excommunications, & intention de priuer noz Princes legitimes de leur Royaume, pour le liurer aux tyrans vsurpateurs. Et de fait l'vn d'eux, lors que la plus grande partie du peuple de France s'estoit reuoltee & rebellee contre le feu Roy, au lieu d'estaindre le feu qui embrasoit & consommoit tout ce pauvre Royaume, il l'alluma dauantage par l'iniuste excommunication, qu'il decerna à l'encontre de luy; encourageant par ce moyen, vn mal-

heureux & detestable moyne, à ietter ses mains parricides sur l'oinct du Seigneur: & tant s'en faut que depuis il ait trouué mauuais ce mechant assassinat, que au contraire il s'en est resiouy, l'a loüé & approuué, s'est vanté l'auoir predict à deux Cardinaux, & à l'Ambassadeur de France: Et pour le regard de l'autre, il est tout notoire qu'il a esté crée Pape, par les brigues & factions du Roy d'Espagne, de ses adherans & partiaux, aux charges & cōditiōs qu'il s'emploiroit de tout son pouuoir, comme il a faict & faict encores, tant par secours d'argent, que par armes spirituelles & temporelles à la ruine de nostre Roy, des Princes de son sang, & de tous les bons & fidelles Frâçois: tellement qu'on pourroit inferer par la dispositiō du droict canō, qu'il seroit loisible, nō seulement aux Cardinaux & autres Ecclesiastiques craignans Dieu, mais aussi aux laiz de l'anathematiser comme inuaseur, & avec forces humaines le chasser du saint siege Apostolique, y ayant esté intronisé, non par les voyes canoniques, mais par grace humaine, brigues & factions

*c. Si quis
pecunia
79. di-
stinct.*

factions tumultuaires.

S'estans donc lesdits Papes monstrez ainsi mal affectionnez à noz Roys & à ce Royaume, fauteurs de leurs subiets rebelles, auxquels ils ont enuoyé des Legats & des Nunces, contre le gré & volonté du Roy, pour les desbaucher de son obeissance, & lesquels ils ont aidé de conseil, de faueur, d'argent & de forces, & s'estans declarez partiaux du Roy d'Espagne, & adherans à l'iniuste vsurpation qu'il pretend faire de cest Estat, il est certain que leurs censures, monitions & excommunications, ne sont iugemens libres, ains attachez par contracts à la necessité: & pouuons dire de tout ce qui est venu & viendra par cy apres de Rome, *Vox Esau, manus autem Iacob*, elles viennent en apparence de Rome, mais en effect d'Espagne, de Sauoye & de Lorraine.

Cessant tout ce que dessus, & presupposant que ces Bulles soient venües de la franche volonté des Papes Sixte & Gregoire, sans aucune contrainte ny passion vicieuse, & qu'ils soient autant dignes de

la Chaire de saint Pierre, que Papes qui ayent esté depuis douze voire quinze cens ans, ie dy neantmoins qu'ils n'ont le pouuoir, & ne leur appartient d'excommunier ceux qui ne sont de leur diocese. C'est l'ordre & police vniuerselle de l'Eglise, en laquelle les dioceses ayans esté diuisez par les Apostres, & leurs successeurs, l'ordre, l'œconomie, & les loix Ecclesiastiques portent, que chacun fasse sa charge en son diocese, sans que les vns puissent eniamber sur les autres.

Je sçay bien qu'à cela, ceux de Rome répondēt que le Pape est l'Euesque vniuersel de la Chrestienté, & que les autres sont seulement appelez, *In partem sollicitudinis, & non in plenitudinem potestatis*. Mais ces maximes ont tousiours esté tenües faulces & tyranniques, & comme telles de tout temps reprouuees, mesmement en France. Je laisse à part ce qui en est dict, tant par saint Irenee que par S. Cyprian, & autres plus anciens docteurs & martyrs de l'Eglise, mesmement par aucuns Papes, & entre autres par saint Gregoire premier, qui appelle precur-

seur de l'Antechrist tout Euesque, voire
 celuy de Rome, qui se qualifiera Euesque
 vniuersel. Je laisse aussi à part la constitu-
 tion du Concile troisieme d'Afrique, qui
 deffend d'appeller l'Euesque du premier
 siege, Prince des Prestres ou souuerain
 Prestre, laquelle constitution est inse-
 ree au grand decret, où pour l'interpreta-
 tion d'icelle, est nōmement adiousté par *c. Primæ
sedis 99.
dist.*
 Gratiā, que l'Euesque de Rome mesmes,
 ne doit estre appellé vniuersel. Et noz
 Theologiens ont condanné ceste pleine
 puissance des Papes, appellans *plenam
potestatem, plenam tempestatē, & verbum
diabolicum*, ayās aussi tenu qu'ils ont puis-
 sance de lier & deslier, *Clauē non errante*.
 Ie me tiens à ce que l'Eglise Gallicane
 a de tout temps soustenu *pēde fixo*, s'estāt
 aduancee iusques là, que lors de la plus
 grande pureté de l'Eglise, elle n'enduroit
 que les Papes se messasent de l'ordinatiō
 des Euesques, collations des benefices
 tant grands que petits, consecration des
 autels, iugement des causes Ecclesiasti-
 ques, & autres choses qui sont du deuoir
 des ordinaires, dont nous tenons encores

plusieurs beaux vestiges, mesmement en ce que nous ne receuons les Legats venans de Rome, sinon apres que le Roy leur a permis entrer en France, & y recevoir leurs facultez, qui doiuent estre prealablement verifiees en Parlement. Mais ce qui approche encores de plus pres au point dont il s'agist à present, c'est que par le decret *de causis*, en la pragmatique & au concordat, les constitutions de l'Eglise Gallicane, ne permettent point au Pape, de cognoistre en premiere instance des causes Ecclesiastiques d'entre les François, ny icelles euoquer, ains doiuent estre iugees par les ordinaires en premiere instance, & apres que par appel elles ont cheminé de degré en degré iusques au saint siege, les Papes n'ont pouuoir de les iuger à Rome, ny commettre le iugement d'icelles à estrangers, ains doivent nommer des iuges regnicoles sur les lieux, pour les terminer en dernier ressort sous leur nom : dont s'ensuit que les excommunications desquelles il s'agist, n'ont peu estre decernees à Rome, mesmes celle qui a esté decernée contre

le Roy à present regnant , ains appartenoit ou à son Euesque Diocesain , c'est à dire à celui de son domicile, d'en reconnoistre en premiere instance : comme fit saint Ambroise Euesque de Milan, contre l'Empereur Theodose, qu'il excommunia (non toutefois à la façon de ces nouvelles excommunications) sans que le Pape qui estoit lors s'en meslast aucunement; ou en tout cas, s'il y auoit de la negligence ou timidité desdits diocessains, qui les auroit empesché de faire leur deuoir, & que le Pape à cause de ce, fut fondé à supplier leur negligence, comme pere & surueillant sur tous les autres Euesques, il auroit peu & deu, audit cas, venir en France luy mesme, ou à tout le moins enuoyer ses Légats pour les exciter, vnir & assembler, & non pas enuoyer ladite excommunicatiõ de Rome, comme par lettre de change. Ce qui se voit auoir esté quasi tousiours obserué parcydeuãt toutes & quantes fois que les Papes ont voulu excommunier les Roys & autres Princes. Pour exemple, quand Gregoire quatriesme voulut entrepren-

dre d'excommunier Loys Debonnaire, il se presenta iusques au pays de Mets, resolu d'entrer en France, si les Euesques ne l'en eussent empesché. Quand Nicolas premier voulut excommunier Lothaire Roy de Lorraine, il enuoya son Legat. Quand Urbain deuxiesme excommunia Philippes premier, à cause de sa concubine, il fit faire par son Legat vn synode particulier, & le confirma en personne au Concile general de Clermont. Quand le Pape Innocent voulut excommunier Philippes Auguste, à cause de sa deuxiesme femme, il enuoya son Legat en France, ce qu'il fit de rechef quand il le voulut excommunier pour les guerres d'Angleterre. Quand Alexandre troisieme voulut excommunier Remond Comte de Tholose, il le fit faire par vn sien Legat au Concile de Palmiers. Qui sont en effect les principales excommunications, lesquelles se lisent auoir esté attentees contre les Roys & Princes de France, excepté celle encores de Lothaire, pour le mariage de Gueldrade, qui se lit auoir esté decernée à Rome : mais c'e-

estoit en vertu d'un arbitrage, & compromis, faict sur l'appel d'une sentence de plusieurs Euesques, qui auoient iugé la cause en premiere instance : & pour ce qu'il y auoit d'autres Euesques qui n'en estoient d'accord, Lothaire & lesdits Euesques compromirent au Pape. Quant à ce qui se lit de Boniface huitiesme cōtre Philippes le Bel, ce ne fut qu'une citation & denonciation simple, & neantmoins elle ne doit nullement estre mise en compte, ayāt esté condamnée par toute la France: Comme aussi celle de Iulles deuxiesme cōtre Loys douziesme, & Ieā Roy de Nauarre : & pareillement celles qui furent attentees contre les Roys Charles V. VI. & VII.

Tout cela soit dit, quant aux personnes des Papes qui ont decerné les Bulles: Mais quant à ceux contre lesquels elles ont esté decernees, c'est chose certaine que la qualité des Roys est telle, qu'elle rend l'excommunication decernée contre eux, nulle. Et pourroit on soustenir, que la puissance du glaue spirituel, qui a esté donnée à saint Pierre, aux Apostres,

& à leurs successeurs, ne se doit estendre que sur les personnes priuees, & non sur les Roys & Princes souuerains: les cœurs desquels sont en la main de Dieu, qui nous les baille tels qu'il luy plaist : qui appelle les Roys Apostats, & fait regner l'hypocrite pour les pechez du peuple. C'est pourquoy l'escriture sainte nous enseigne qu'il leur faut obeir tels qu'ils soient, non seulement pour la crainte & necessité, mais pour nostre conscience. Et sainct Paul dit que quiconque resiste au Prince souuerain, resiste à ce qui a esté ordonné de Dieu : & en ce faisant, s'acquiert damnation eternelle. Ce qui est si auant veritable & necessaire pour nostre salut, que nostre sauueur de qui toutes les actions nous sont autant de leçons & preceptes, pour nous conuier par son exemple à l'obeissance de noz Roys, & nous monstrier que quels qu'ils soient, nous ne leur deuons resister, a voulu luy mesme naistre & viure sous des Princes infideles, voire tyrans, & monstres du genre humain, y a faict viure ses Apostres, & tout ce qu'aux premiers 314. ans s'est

s'est trouué de plus net en l'Eglise : lesquels tyrans & monstres infideles, le sdicts Apostres & leurs successeurs ont honoré, leur ont payé tributs, encores que du temps de Tertullien, ils fussent si forts & en si grand nombre, que s'ils eussent voulu, il leur eust esté facile de les chasser & exterminer. Ce que tant s'en faut qu'ils ayent faict, qu'au contraire ils ont prié pour eux, ont esté à la guerre sous eux contre leurs ennemis, & ont presché aux autres leur obeissance. Ce qu'ont faict presque 400. ans, depuis iusques en l'an 700. la plus part des Chrestiens, voire les Papes, sous plusieurs Empereurs Arriës & Vtichiens : & apres eux, sous les Roys Ostrogots aussi Arriens, dominâs en Italie & mesmes à Rome : & apres les Roys Ostrogots, sous les Roys Lombards, aussi pour la plus part Arriens. Et quant aux autres nations Chrestiennes, comme l'Hespagne & la plus part des Gaules, ils ont longuement vescu sous des Roys Vvisgots, aussi Arriens : ausquels Empe- reurs Roys & Princes heretiques, tous les Papes & autres Prelats Chrestiës & Ca-

tholiques, pour la plus part tressaincts personnages, n'ont oncques entrepris de desobeir, ains leur ont porté & faict porter tout honneur, deuoir, subiection & obeissance, tant s'en faut qu'ils ayent iamaïs entrepris de les excommunier & interdire, sous ombre d'heresie ou autre pretexte quelconque. Nous lisons que Iean premier tref-sainct Pape, fut enuoyé par Theodoric vers l'Empereur Iustin, pour faire restituer les Euesques Arriens en leurs sieges : & Agapet Pape, fut enuoyé par Theodoric vers Iustinian, pour excuser le meurtre d'Amalasunte. Estant donc ceste maxime veritable, que tous subiets par l'ordonnance de Dieu, sont tenuz seruir & obeir à leurs Princes quels qu'ils soient, pour la necessité de leur salut, il s'ensuit qu'ils ne doiuent estre par le moyen de l'excommunication, priuez de l'obeissance & subiection à eux deüe par leurs subiets. Et si quelquesfois on a veu en la primitiue Eglise, que les Prelats & pasteurs ayent aucunemēt vsé du glaiue spirituel à l'encontre de leurs Princes souuerains, à tout le moins ç'a esté avec

tant de modestie & charité, qu'ils ne les ont voulu perdre, mais par quelque douce correction, les ont faict recognoistre leur peché, comme nous lisons de saint Ambroise, lequel excommunia Theodose, de la mineure excommunication, sans le priuer, ny de la communion des fideles, ny de l'obeissance de ses subiets, mais seulement pour vn temps, de l'entree de l'Eglise, iusques à ce qu'il eust faict penitence de son peché. Mais de vouloir vser extraordinairement de ceste puissance, qui a esté donnée à saint Pierre & à ses successeurs, pour priuer les Roys de leurs Royaumes, c'est chose directement contraire à la parole de Dieu, & à l'usage ancien de l'Eglise. Et de faict il ne se trouue point qu'auant l'annee 1080. ou enuiron les Papes ayent ietté aucune excommunication, portant interdiction contre les Roys & autres Princes souuerains, si ce n'est qu'on vueille compter pour la premiere, celle que s'efforça ietter Gregoire troisieme, contre l'Empereur Leon Iconomaque en l'annee 759. pour la querelle des Images, combien que Gregoire

deuxiesme son predecesseur, eust empesché que pour mesme cause ses subiets d'Italie ne se reuoltassent & esleussent vn autre Empereur en sa place, ainsi que recite Platine. Mais ceste pretendüe excommunication ne doit estre pour rien comptee, parce qu'elle n'eust aucun effect: & les Grecs & autres Orientaux subiets dudit Empereur Leon, n'y eurent esgard non plus qu'à vne chanson: d'autant que l'Eglise Grecque estant dès long temps separee de la Romaine, les foudres venans de la part des Papes, comme de Iuges entierement incompetans, ne leur faisoient ny chaud ny froid. Donc la premiere excommunication maieure, & interdiction qui aye iamais esté ietee en la Chrestienté, est celle du Pape Gregoire septiesme, auparauant nommé Hildebrand, contre l'Empereur Henry troisieme, pour la querelle des inuestitures des Euesques, laquelle peu apres fut suyue par vne autre, ietee en l'an 1085. par Urbain deuxiesme, contre Henry quatrieme, fils dudit Henry troisieme. Mais tant s'en faut que ce remede violent ait proffi-

té à l'Eglise, que dès ce temps là, on remarque qu'elle changea son humilité ancienne, en orgueil, cruauté & tyrannie, dont les scandales nasquirent par tout en telle foison, que deslors les schismes & heresies, dont aujourd'huy nous beuons la lie, ne cesserét de sourdre & prouigner sans intermission, & les Papes changerét le Ciel & la cure d'iceluy, aux dominations & soins temporels & terrestres. Et de faict, Sigisbert en sa Chronologie, detestant ladite excommunication ietee par Urbain deuxiesme, & non seulement Sigisbert, mais encores l'Abbé d'Vsparg & Otho de Frisinge (tous autheurs approuuez par l'Eglise, & qui ne sont point censurez par le Concile de Trente, & partant irreprochables par ceux qui se disent vrais Catholiques Romains) ont appellé ceste nouvelle & insolente maniere d'excommunier & interdire les Princes souuerains, heresie pestifere & pernicieuse à l'Eglise.

Cela soit dit en general, pour mōstrer que l'excōmunicatiō maieure, & principalement celle qui porte interdiction &

priuation d'Estats & Royaumes, ne peut estre ietee contre aucuns Roys ou Magistrats sonuerains. Mais en particulier, quant aux Roys de France, c'est chose dont on n'a oncques douté. Car ils sont & ont esté de tout temps immemorial en possession de ne pouuoir estre excommuniez & interdits par les Papes, pour quelque occasiõ ou pretexte que ce soit, en possession toutes & quantes fois que les Papes l'ont voulu entreprẽdre, qu'eux leurs subiets & Parlemens, & sur tous les Prelats de l'Eglise Gallicane y ont virilement resisté, tant par armes spirituelles que temporelles. Le premier & plus ancien des actes qui se puissent recueillir dans noz registres & histoires, conseruatif de ceste possession, fut ce que mandèrent les Euesques de Frãce au pape Gregoire quatriesme, lors que voulant diuiser la Frãce entre le pere & les enfãs, à fin de l'affoiblir & assubiettir à soy, il se presenta à l'instigatiõ des enfans de l'Empereur Loys Debõnaire, pour l'interdire & excommunier: Sçauoir est, que s'il estoit venu pour excommunier leur Roy, il sen

retourneroit excōmunié luy mesme, parce, dirēt ils, que les statuts des anciens canōs ne luy permettoiēt point telle chose. Les statutz des anciēns canons, ils les prenoient, tant sur ce qu'il se trouue porté par plusieurs Conciles en general, touchant l'obeyffance deüe aux Roys par leurs subiects, qu'en particulier par les capitulaires de la France, conformes au canon du Concile de Toledé, par lesquels estoit enioinēt aux Prelatz de receuoir à la communion tous ceux que la Majesté du Roy auroit receu en sa grace, ou en sa table, encores qu'ilz eussent esté excōmuniez par eux, ou par autres, afin, dit le canon, que l'Eglise ne soit veüe reietter ou condamner, ceux dont il plaist à noz Roys se seruir. Yues Euesques de Chartres, par l'autorité de ce canon se purge en son Epistre 123. de ce que le iour de Pasque il auoit receu à la saincte communion vn excommunié, & en son Epistre 195. il conseille à l'Archeuesque de Sens de receuoir à la communion aucuns domestiques du Roy, qui auoient esté excommuniez, mesme sans satisfac-

» ction ; d'autant, dit-il, que le maniement
 » des choses temporelles , ayant esté attri-
 » bué aux Roys , qui sont chefs & fonde-
 » ment du peuple , s'ils abusent quelques-
 » fois de la puissance qui leur est attribuee,
 » ils ne doiuent estre par nous grieuement
 » vlcerez : Mais lors qu'ilz ne voudront ac-
 » quiescer aux sainctes remonstrances des
 » Ministres de Dieu , il faut les reseruer au
 » iugemēt diuin, où ilz seront d'autāt plus
 » griefuement punis , qu'ilz auront esté re-
 » fractaires aux sainctes admonitions.

D'autres possessions anciennes de ce
 droict de noz Roys, il est aisé d'en remar-
 quer dans noz histoires & liures , comme
 entre autres dans les epistres de Hinc-
 marus Archeuesque de Reims , mesmes
 celle qu'il escrit au Pape Adrian, sur ce
 qu'il luy auoit commandé de se distraire
 de l'obeyssance de Charles le Chauue,
 souz ombre qu'il n'auoit voulu plier souz
 le commandement dudit Pape , & en ce
 faisant laisser le Royaume de Lothaire à
 Loys d'Allemagne: a quoy ledit Hincma-
 rus respond fort virillement , que les Pa-
 pes n'ont telle puissance sur les Roys , ny
 leurs

sur leurs subiects , & qu'ils ne les peuuent interdire, ne se trouuant point que les anciens Chrestiens se soient soustraicts de l'obeyssance de leurs Princes , bié qu'Arriens ou payens . Et aussi les epistres de Gerbert Archeuesque de Rheims , qui depuis a esté le Pape Siluestre deuxiesme, & mesme celle qu'il escrit à l'Archeuesque de Sens , & aux autres Euesques qui auoiét condamné Arnulphe Archeuesque de Reims, pour crime de leze Majesté , par laquelle il leur mande qu'ilz n'ayent à craindte l'iniuste excommunication du Pape Iean dixseptiesme , qui vouloit faire restituer ledit Arnulphe. Comme encores pour descendre en des temps plus recens, la mesme possession se trouue assez prouuée , par l'appel qu'interietta Philippe Auguste, de l'interdictiõ contre luy iettée par le Pape Innocent troiesme , afin de l'empescher de recouurer la Normandie , sur le Roy Iean sans-terre son vassal , nonobstant laquelle interdiction (dont ledit Auguste appella au Concile futur) il ne cessa de paracheuer sa conqueste , & la mit entierement afin,

& ce qui se passa long temps depuis, entre le Pape Boniface huitiesme, & le Roy Philippes le Bel, & entre Iules deuxiesme & le Roy Loys douziesme : contre toutes lesquelles possessions on ne nous peut aleguer que lesdictes trois excommunications, celle du Pape Nicolas contre Lotaire, Roy non de France, mais de Lorraine celle du Pape Urbain deuxiesme, contre le Roy Philippes premier, & vne autre du Pape Innocēt troisieme, contre le mesme Roy Philippe Auguste: Ausquelles trois excommunicatiōs, toutesfois il est tresfacile de respondre : par ce que quant à celle du Pape Nicolas, il la fit en qualité d'arbitre esleu, & duquel partant ledit Lotaire ne pouuoit decliner la iurisdiction. Quant à celle de Philippes premier, elle fut faicte par le Concile de Clermont, & non par le Pape Urbain seul : & quant à celle contre Philippes Auguste, elle fut faicte par les Prelats François, assistans avec eux vn Legat du Pape, & non point ietree par ledit Pape, ny enuoyee de Rome en guise de lettre de change, *extra partes*: ioinct (& cel-

le là est vne des principales responce) que lesdictes trois excommunications estoient mineures & non maieures, & données en causes pures Ecclesiastiques, veu qu'en toutes trois il s'agissoit de sacremēt de mariage, & de faire reietter par lesdits Roys leurs concubines, qu'ilz auoient prinſes au lieu de leurs femmes: & à tout le moins esdictes excommunications, il n'estoit point question d'interdiction. Je ſçay que contre cela aucuns me dirōt, ſuiuāt les chroniques de ſainct Denis, ou autres moynes ignorans, que l'excommunication iettée contre Philippe premier estoit maieure, portant interdiction de luy obeir, ſouz ombre que ladicte hiſtoire porte, que tant que ladicte excommunication dura, les Ecclesiastiques eſcriuans les dattes en leurs actes publics, mettoient ces mots, *Regnante Christo*, & non point *regnante Philippo*. Mais cela ſe trouue aſſez confuté par les bons hſtoriens, & autheurs du temps: meſmes par Yues Eueſque de Chartres, fort affectiōné à la cauſe des Papes, qui eſcriuoit ſouuent audit Roy, lors de ladicte excom-

munication, & le recognoissoit pour son Roy : Ce qu'il n'eust faict s'il eust esté interdit, & se voit encores par les mesmes historiens, que ledit Philippes estoit fort bien recogneu & obey par ses subiects. Au surplus qu'on lise les chroniques, il se trouuera que pendant & nonobstant toutes lesdictes trois pretendües excommunications, lesdicts Roys estoient plaine-ment recogneuz, & n'opererent lesdictes excommunications, sinon qu'entât qu'il pleust ausdicts Roys : lesquels volontai-rement reprindrent leurs femmes, à la priere instante de leurs subiects, & par ce qu'ilz en auoient des enfans: Mais ce qui met la chose du tout hors de dispute, est ce qui se passa depuis en l'an 1280. entre les Papes & noz Roys.. Sçauoir est, que noz Roys voyans que depuis, & en consequence de ladicte excommunication maieure, les Papes alloient de iour en iour en vne haultesse & presumption si grande, qu'ilz ne craignoient point d'v-fer de leur glaiue, & en frapper à tort & à trauers, contre toutes sortes de Princes, Empereurs, Roys, & Republiques, pour

seruir à leur interest priué, & passion particuliere, & pour estendre leur domination sur eux: & doutans que si telles choses leur estoient souffertes, ilz ne s'enhardissent avec le temps de mettre leur Royaume en pareils troubles qu'ilz auoient faict l'Allemagne, l'Italie & autres pays de la Chrestienté, ilz s'adresserent ausdicts Papes, pour leur représenter & faire voir leurs anciens droicts & libertez, ensemble de leurs subiects, seruiteurs & officiers, & de toute l'Eglise Gallicane, dont la memoire estoit lors toute fresche, & sur la preuue qu'ilz leur en monstrent, obtindrent d'eux iusques à douze declarations, bulles & titres nouveaux, sçauoir est des Papes, Martin troisieme & quatrieme, Gregoire huitieme, neuuiesme, dixiesme & onzieme: Alexandre quatrieme, Clement quatrieme & cinquiesme, Nicolas troisieme, Urbain 5. & Boniface douzieme. Lesquelles Bodin (que ie nōme pour estre des principaux factieux de la ligue) resmoigne en sa Republique, auoir veües dans le tresor des Chartres, suiuant lesquelles bulles & de-

clarations, & en consequence d'icelles,
 se trouuent depuis infiniz arrests don-
 nez és Parlemens de Paris, Tholoze, &
 autres, dōt les registres depuis les années
 1300. iusques en l'année 1500. sōt pleins,
 ensemble les liures des vieux praticiens
 de France, comme Boërius, Chassaneus,
 Benedicti, Anfrerius & Rebuffi: specialem-
 ment s'en trouue vn fort aduantageux,
 contre vn Arrogonnoys nommé Maistre
 Claude Sanceloup, & vn cheuaucheur
 du Pape Benedict natif de Castille, qui
 auoyent apporté & voulu publier des
 Bulles contre le Roy Charles V I. &
 le Royaume: lesquelles Bulles furent le
 16. de Iuillet 1491. publicquement la-
 cerées en la grand chambre, où estoient
 presens plusieurs Princes, Seigneurs,
 Gentils-hommes, Prelats, Bourgeois &
 autres, tant du Clergé que de l'vniver-
 sité: & 12. ou 15. iours apres, lesdicts
 deux Bullistes, vestuz de tuniques de
 toille paincte, où estoient figurées
 la presentation desdictes Bulles, &
 les Armes de Benedict renuersées, fu-
 rent amenez des prisons du Louure

au Palais, où ils firent amende honorable à la leuee de la Cour, puis furent menez mitrez en vn tombereau par les carrefours de Paris. Se trouuent encore deux autres arrests donnez les 19. & 26. Feurier, 1410. entre l'Archeuesque & l'Archidiacre de Reims, par lesquels conformément à ce que prouue du Tillet, en ses memoires, il fut dict qu'un Pair de France ou officier, ne pouuoient estre excommuniez. Vn autre du douziesme Decembre 1468. par lequel vn interdit ietté par l'Official de Besançon, contre la ville de Neuers, fut déclaré nul & abusif. Vn de l'an 1488. par lequel le semblable fut dit pour les habitans de Gand & de Bruges. Et se trouuent és mesmes registres plusieurs lettres patentes de noz Roys à semblable fin: mesmes du Roy Charles cinquiesme, de l'an 1339. & du Roy Charles septiesme du deuxiesme Septēbre, 1440. portans deffences aux Cours de Parlement & autres Iuges, de ne souffrir estre publiees des censures, excommunications, fulminations & priuations, contre les subiets du Roy, & que ceux qui

le feroient,seroient puniz comme infra-
cteurs des ordonnances & perturbateurs
du repos public. Mesmement en l'annee
1580.au mois d'Octobre, fut donné ar-
rest, auquel presidoit Maistre Barnabé
Briffon, lors President en ladite Cour,
portant commission pour informer con-
tre les Archeuesques & Euesques,qui au-
roiet receu la Bulle *de cæna Domini*, con-
tenant semblables excommunications,
donner iour à ceux qui l'auoient faiet pu-
blier,& saisir leur temporel, & fut l'im-
primeur qui s'estoit ingeré de l'imprimer
tres-seuerement chastié. Tous lesquels
actes, tendans à la manutention des li-
bertez,& preeminences de noz Roys &
de ce Royaume, n'ont point esté de si le-
gere importance,qu'à eux, & nō autres,
nous ne deuions attribuer la tres-longue
duree de cest Estat, qui a demeuré en son
entier 1200.cōtinuels:au lieu que si nous
voulions soigneusement esplucher les hi-
stoires des autres Empires & Monar-
chies,nous les trouuerons auoir fort peu
duré,& auoir esté pour la plus part asser-
uies,renuersees & transferees, non point
vne,

une, mais plusieurs fois, par le moyen de telles entreprises des Papes, & desordres naiz à l'occasion d'icelles. l'ay obmis de raconter ce qui fut fait contre Boniface huitiesme / en estant l'histoire assez cogñue) tant par le Clergé de France, qui appella comme d'abus de sa creation, & intrusion au futur Concile, que par le Parlement qui fit publiquement brusler sa bulle, & par aucuns Gentils-hommes François, conduits par Nogaret, & aydez par des Romains, qui le prindrent en un Chasteau, où il s'estoit allé promener, le conduirent és prisons de Rome, où il mourut miserablement.

l'adiousteray, à ce que dessus, que ledit Boniface huitiesme, lequel, comme dit Platine, vouloit mettre és cœurs des Roys, des Princes & des peuples, la terreur & la crainte, plustost que la religion, & disposer de leurs Royaumes & Estats à sa discretion : fessant par sa tyrannique extrauagāte, *Vnam sanctam*, attribüé non seulement la puissance du glaive spirituel sur les Roys, Princes & Empereurs, mais aussi du temporel, pour les priuer quand

bon luy sembleroit, de leurs Estats, Empires, Royaumes & principautez. Clement cinquiesme son successeur recognoissant les libertez & franchises du Royaume de France, par l'extrauagante. *Meruit*, qui est au tiltre *De priuilegys*, declara qu'il n'entendoit qu'aucun preiudice fut faict aux Roys de France, par ceste cōstitutiō de Boniface, ny q̄ par le moyē d'icelle, le Roy son Royaume & ses subiets, fussent dauantage assubiectis à l'Eglise Romaine, qu'ils estoient auparauāt. Or est il qu' auparauant ils n'auoient iamaïs recogneu les Papes, ny autres quelconques, en la temporalité, comme dés long temps auparauant, auoit esté recogneu par Innocent troisiésme, au chapitre, *Per venerabilem*, au tiltre, *Qui filij sint legitimi*. Il s'ensuit donc que les Papes n'ont puissance de priuer noz Roys de leur Royaume. Ce que dessus est pour le regard de la qualité de nostre Roy, contre lequel la bulle du Pape Sixte cinquiesme a esté decernée, & en consequence de laquelle, celle de Gregoire quatorziésme s'en est ensuyuie. Reste à parler

sommairement de la qualité de ceux qui
 sont suspenduz & excommuniez par les-
 dites Bulles de Gregoire quatorziesme.
 Et ne m'arresteray point à ce que noz
 constitutions canoniques portent, que
 les Prestres & principalement les Eues-
 ques ne peuuent estre condamnez, sinon
 avec fort grande cognoissance de cause,
Et nisi conuicti aut confessi fuerint, & mes-
 mes que pour condamner & deposer vn
 Euesque, il faut qu'il soit conuaincu par
 le tesmoignage de soixante & douze tes-
 moings, gens qualifiez. Mais ce qui est
 plus considerable és personnes, tant des-
 dits Euesques, & des autres Ecclesia-
 stiques, que des laiz comprins en ces
 Bulles, est que tant par la disposition du
 droict, que par l'autorité des saints do-
 cteurs, lors qu'il y va du peché d'une mul-
 titude, il n'est loisible de l'excommunier,
 principalement quand telle excommu-
 nication peut causer vn schisme en l'E-
 glise, comme il est deduit amplement par
 saint Augustin, en son troisieme liure,
 contre l'Epistre de Parmenian Donati-
 ste, lequel dit que tels conseils d'excom-

*c. Placuit
 & seq.
 2. qu. 5.*

*ca. nō po-
 test 23.
 qu. 4.*

munication sont inutiles , pernicioz, pleins de sacrilege & d'impieté : & troublent plus les bons infirmes, qu'ils ne corrigent les meschans . Et dans les registres des anciennes ordonnances , nous trouuons qu'en l'an 1369. le Roy Charles cinquiesme , deffendit à tous Prelats & autres, d'excommunier les villes, bourgades, & communautéz de son Royaume. Le mesme Roy tres-catholique, contre l'ambition des Papes, fit composer le dialogue intitulé, *Somnium Viridarij*.

Cela suffise pour le regard des personnes, contre lesquelles toutes lesdites Bulles ont esté decernees. Quant à la qualité de la chose, il est certain que les Bulles sont pareillement nulles, soit pour le regard de la formalité, soit qu'on considere le fonds. Quant à la forme , nous auons desia discoursu, comme par personnes recusables, & qui estoient Iuges & parties tout ensemble, elles ont esté premierement complotees & concertees , puis dictées , & en fin decernees , publiees & executees. Le tout *in rē* de ceux qui les decernoient , & qui en ce faisant,

estoyent iuges & parties, & qui d'allieurs
 voulussent ou non, estoient contrainsts
 & forcez de ce faire, & par contract &
 traité s'y estoient obligez. C'est pourquoy
 sans repeter tout cela, ie me contenteray
 seulement de dire en cet endroit, qu'ou-
 tre ces nullitez & celle que nous auons
 encores cotee, de ce que ladiete bulle
 est decernee, *extra partes*, il y en a enco-
 res vne autre apparente & indubitable,
 c'est quelle est donnee sans ouyr, ny faire
 appeller les parties. Et qui pis est, celle de
 l'an 1585. donnee contre le Roy, n'a ia-
 mais esté publiee en France, ny signifiee:
 ce qui la rend nulle de toute nullité. Si
 on dit que en cas de notorieté, il n'est
 point besoin de citation, on respond que
 ceste maxime est fauce, & telle tenüe par
 les Canonistes mesmes: car ils disent biẽ
 que *notorium non indiget probatione*. Mais
 que celuy contre qui on alegue la no-
 torieté, ne doit point estre adiourné,
 quand ce ne seroit que pour faire preuue
 avec luy de la notorieté: c'est chose dont
 iamais nul ne douta, estant certain que
 tous iugemens, quels qu'ilz soient, ou se

doiuent donner contradictoirement parties ouyes, ou par defauts & contumaces icelles appellees : ce que prouuet les Canonistes par l'exemple de Dieu mesme, au premier iugement qu'il fit contre Adam. Car combien qu'il ne doutast point qu'il n'eust peché, il le cita neantmoins prealablement, afin de donner exemple aux hommes de faire le mesme en leurs iugemens. Comme encores il fit le semblable contre ceux de Sodome & Gomorrhe, desquels le peché estoit non seulement à luy, mais à tout le mondé notoire & manifeste. Et neantmoins il dit, *Descendam & videbo* : Ce qu'aussi les Papes de tout temps ont pratiqué, en toutes excommunications qu'ilz ont entrepris de faire, comme celle dont nous auons cy deuant parlé, contre les Roys Loys Debonnaire, Lotaire, Philippe premier, & Philippe Auguste, qui tous prealablement furent citez auparauant que de rien decerner contre eux, & mesmes les Legatz enuoyez en France, pour assister à la confection de leurs proces, encores que la notorieté de leurs fautes fust euidente, &

que publiquement on vist leurs concubines à leurs costez, & leurs femmes legitimes chassées: Mais on iugeoit deux choses estre necessaires, l'une que suyuant toute forme iudiciaire, ils fussent citez pour venir proposer leurs deffenses: l'autre que selon les formes, Ecclesiastiques, que Dieu mesme de sa bouche nous à prescrit, ilz fussent admonestez par plusieurs fois, pour venir voir s'ilz voudroient corriger leurs fautes: & le mesme se trouue auoir esté pratiqué par le Pape Gregoire septiesme, par Pascal deuxiesme, Innocent troisieme, Alexandre troisieme, cõtre les Empereurs Henry quatriesme & cinquiesme, & les Federics premier & deuxiesme, & les autres Empereurs iusques au nombre de sept, lesquels auant qu'excommunier, ilz faisoient citer en diuers Conciles, comme en celuy de Lyon & autres. Le mesme encores fut obserué cõtre le Roy Henry huictiesme d'Angleterre, par Clement huictiesme & son successeur, & dernièrement en l'annee, 1564. le feu Pape Pie quatriesme, voulāt proceder par excommunica-

tion contre la Royne Iehanne de Nauarre, qui estoit de la religiō prerēdue reformee, il cōmença par citatiō, laquelle toutesfois depuis, il reuoqua sur les remōstrances que luy enuoia faire le feu Roy Charles IX, contenāt ce que nous auōs dit cy dessus, que les Papes n'auoiēt puissāce de decerner monitoires, ou excommunications contre leurs subiects. N'y ayant dōc es excōmunicatiōs dōt est question, ny citatiō, ny monitiōs précédētes qui sōt necessaires, mesmes par la disposition du droit Canon; il est certain qu'elles sont nulles & defectueuses. Je sçay bien qu'on dira que par la bulle contre les Ecclesiastiques, il y a trois monitions, leur estans donnez quinze iours de delay pour le recognoistre, sçauoir est cinq iours pour la premiere monition, cinq pour la secōde, & les autres cinq pour la troisiēme. Mais c'est vne pure moquerie: car tant par la disposition diuine que par le droit canō, auāt qu'excōmunier aucū, il faut l'admonester par plusieurs & diuerses fois de se recognoistre. Or si iamais en affaire quelconque, ces formalitez ont esté requises, elles

elles estoient en ceste cy, en laquelle il
 fagissoit du repos & de la ruine, non seu-
 lement de ce grand Royaume, mais aussi
 de toute la Chrestienté. Ioinct que d'ai-
 lieurs on ne peut dire, pour le regard de
 nostre Roy, qu'il y eust de la notorieté.
 Car combiẽ qu'il fut notoire, que depuis
 la iournee S. Barthelemy, en laquelle il
 fit profession de nostre religion, il fut re-
 tombé en la sienne precedente, toutes-
 fois pour cela, il ne se peut dire, q notoi-
 rement il fut relaps: car pour elider cet-
 te notorieté, ceux qui deffendent sa cau-
 se, alleguent vn faict fort pertinent & vray-
 semblable, c'est qu'il ne s'estoit faict Ca-
 tholique volontairement, mais par crain-
 te & par force, & pour euiter la mort
 dont on le menaçoit, à l'exemple de tous
 ses seruiteurs qu'on auoit massacré en sa
 presence, pour esbranler sa fragilité pue-
 rile, n'estant pour lors aagé que de dix-
 sept ou dix-huict ans: sans qu'au surplus
 on se donnast peine de l'instruire en la re-
 ligiõ Catholique: car ceux de Guylé qui
 pour lors possedoient la Royne Mere, ne
 craignoient rien tant que cela, de peur

que se rendant à bon escient Catholique, tous moyens de remuer & prendre les armes luy fussent ostez. On ne peut aussi dire qu'il soit notoirement heretique, ayāt tousiours protesté ne vouloir s'opiniastrer en sa religion, lors qu'on luy monstrera son erreur, & festant tousiours soubmis à l'instruction, comme il sera deduit plus amplement par cy apres.

Cela soit dit, quant aux formalitez: quant au fonds, c'est chose tres-certaine que lesdites Bulles, en quelque sens qu'on les vueille prédre, sont nulles & iniustes; Nulles en ce que les Papes ne sont fondez en iurisdiction aucune, de iuger & decider les droicts des Royaumes, veu que c'est matiere purement temporelle & prophane, & de laquelle partāt par leurs confessions mesmes, ils ne se peuuent aucunement mesler, à tout le moins pour le regard du Royaume de Frāce, cōme il a esté remonstré par cy deuāt: Iniuste, en ce que par ladite Bulle, le Roy a esté déclaré heretique & relaps, & cōme tel priué de ses Royaumes & Estats. Or est-il que l'un & l'autre est faux & calomnieux: car en-

cores qu'il soit en erreur, toutesfois ayant
 tousiours protesté, cōme il fait encores,
 qu'en luy faisant voir, soit en vn Concile
 general ou national, soit en vne cōferēce
 de docteurs, qu'il y a erreur en sa religiō,
 il est prest à s'en departir, on ne peut dire
 qu'il soit heretique, cōme il est expresse-
 ment decidé par nostre droict canon, &
 par la doctrine de S. Augustin, qui dit,
*Que cēluy est heretique, lequel pour quelque
 commodité temporelle, & principalement
 pour vaine gloire, & pour ambition de re-
 gner, inuente ou suit des faulces & nouvelles
 opinions, & non celuy qui croit à ceste espee-
 ce d'hommes, & est trompé par vne fauce ima-
 gination de verité & de pieté, & que ceux
 qui deffendent sans obstination leur opinion,
 quoy que faulce & peruerse, laquelle ils n'ont
 point presumptueusement inuentee, mais la
 tiennent de leurs parens, seduits & tombez
 en erreur, & neantmoins recherchent cu-
 rieusement la verité, prests à se corriger, lors
 qu'ils l'auront trouuee, ils ne doiuent point
 estre reputez pour heretiques. Aussi peu est
 nostre Roy relaps: car ayant esté nourry
 & instruit dès sa plus tendre ieunesse, en*

*Ca. heret-
 icus 24.
 qu. 3.*

*Ca. Dixit
 Apostolus
 ead. qu.*

la religion, laquelle il tient encores de present, on ne peut dire qu'auant la sainct Barthelemy, *fuërit lapsus*, quoy qu'il fut en erreur: tellement que quand il seroit vray, que lors de la sainct Barthelemy, il fut volontairemēt entré au giron de l'Eglise, quand il s'en est depuis departy, *Lapsus est, & non relapsus*. Mais c'est chose toute notoire, comme il a esté dit cy deuant, qu'il fut contraint par force, & par la terreur des armes de la sainct Barthelemy, à faindre de quitter sa religion, & se faire Catholique, sans auoir esté aucunement instruit.

Mais passant oultre, quand bien toutes ces calomnies seroient veritables, si est ce que pour cela, le Pape n'auroit eu droict de le priuer de son Royaume: Car par quelle loy est il porté, que les relaps soiēt incapables des Estats & dignitez, tant seculieres qu'Ecclesiastiques, sans aucun espoir de restitution, sinon par les constitutions des derniers Papes, qui n'ont iamais esté receues en Frāce, non plus que le reste des Decretales, Clemētines & extrauagantes, & partant n'y peuuent faire

droict:veu mesmes qu'elles sont contraires à l'Euangile, qui dit, *Non tantum septies, sed septuagesies septies*: Suyuant aussi les canons & reigles de l'Eglise, qui parlēt de *lapsis reparandis*, & ce que les saints docteurs ont tant soustenu cōtre les No-
tiens & Donatistes?

Nous auons cy deuant dit, que par les preceptes de nostre Seigneur & de ses Apostres, nous sommes instruits d'obeir à noz Roys tels qu'ils soient, & de rendre à Cesar ce qui luy appartient. S. Pierre en sa premiere Epistre, dit aux Chrestiens qui viuoient lors sous des Princes Payēs & idolatres, *Soyez subiets à tout ordre hu-* 1. S. Pier.
2.
main pour l'amour de Dieu, soit au Roy comme au superieur, soit aux Gouverneurs qui sont enuoyez de par luy, à la vengeance des malfaiçteurs, & à la louange des bons. Portez honneur à tous, ayez fraternité, craignez Dieu, honorez le Roy. Seruiteurs, soyez subiets en toute crainte à voz maistres, non seulement aux bons, mais aussi aux desreglez. Car cela est la grace, si quelqu'un à cause de la conscience endure fascherie souffrant iniustement. Et saint Paul instruisant Tite

Tit. 3.

son Disciple, luy dit, *Admonestez les qu'ils soient subiets aux principautez & puissances, qu'ils obeissent aux Gouverneurs, &*

Rom. 13.

qu'ils soient prests à tout bon œuvre. Et aux Romains, Toute ame soit subiette aux puissances souueraines, comme estans ordonnees de Dieu. Parquoy qui y resiste, s'acquiert dānation eternelle. Et pourtant il faut estre subiets, non point seulement pour l'ire, mais aussi pour la conscience. Et saint Ieā Chrysostome, interpretant ce passage de saint Paul, remarque qu'il a dit expres, toute ame, pour monstrier qu'il n'y a personne exempte de ceste subiection. Et non seulement par le nouveau testament, nous sommes enseignez d'obeir à noz Roys quels qu'ils soient, mais aussi par les exemples & preceptes du vieil testament: Car combien que Saül eust esté reietté de Dieu, qui auoit esleu Dauid en sa place, toutesfois nonobstant ceste condamnation, il n'a iamais esté abandonné par ses subiets, ny par Dauid mesmes, qui de son viuant luy a porté tout honneur & reuerence, quoy qu'il le persecutast pour le faire mourir. Nous pouuons dire le

mesme de Salomon, & plusieurs Roys de Hierusalem, lesquels combien qu'ils fussent tombez en idolatrie, toutesfois leurs subiets ne se departoient de leur obeissance. Dans Baruch il appert que les enfans d'Israël, ayans esté menez captifs en Babylone, Dieu leur commanda de se soubmettre au ioug, & seruir le Roy de Babylone, & en ce faisant, leur promit le retour en leurs pays: au contraire fils n'obeissoient à ce commandement, les menaça de leur ruine. Et par le Prophete Hieremie leur est dit, *Demandez la paix de la Cité, en laquelle ie vous ay faict trans-^{Baruch.}
migrer, & priez pour elle: car en sa paix vous aurez paix: Que voz Prophetes ne vous seduisent point, qui sont au milieu de vous, ne voz deuins, & n'entendez à voz songes que vous songez: car ils vous prophétisent faulcement en mon nom, par ce que ie ne les ay point enuoyez, dit le seigneur.*^{Hiere. 29.}

Par ces passages de l'escriture, & plusieurs autres, nous sommes instruits d'obeir à noz Roys bons ou mauuais qu'ils soient, sur peine d'estre puniz comme refractaires aux commandemens de Dieu,

Iob. 12.

Iſaye 3.

Prou. 21.

lequel tenant les cœurs des Roys en ſa main, les enclinant à toutes choſes qu'il veut, les donne ores iuſtes & craignans Dieu, ores hypocrites, ores bié ſentans de la foy, & ores idolatres & heretiques, ores bōs & clemēs, & ores cruels tyrans, ſelon qu'il luy plaift traiter ſon peuple fauorablement ou rigoureūſement, c'eſt luy qui donne des enfans pour Princes, & des effeminez pour regner. C'eſt luy qui change les cœurs des Roys de la terre, & les faiēt fouruoyer. Ce n'eſt point aux hommes à entreprendre de s'oppoſer à ſa volontè, ny contre icelle eriger des forts, des machines & des conſeils: faire comme les enfans de Nembrot, qui ozerent defier le ciel. Bref c'eſt à eux à plier le col, & s'humilier ſoubs la toute-puiſſance de Dieu, & remaſchant ce que dit Sainēt Paul aux Corinthiens. *Homo quies?* ſe contenir en l'oſeruacion de ce diuin precepte, *Noli altum ſapere, ſed time*, À cela comme nous auons deſia dit, nous ſommes conuiez par les exemples de noſtre Sauueur, qui a voulu naiſtre ſouz vn Empereur Payen, & ſouz Herode

rode cruel Tyran, & de tous les saints Peres de l'Eglise primitive, qui viuoient souz des Princes Payens & heretiques. Et estoit lors l'Eglise en meilleur estat, & composée de ministres plus deuots & plus saints sans comparaison que leur posterité, comme eust l'affliction & subiection que Dieu leur enuoyoit par ces Tyrans, le vray exercice du Chrestien, à la patience, humilité & sainteté, qui se nourrit comme la roze au milieu des espines, & qui s'estouffe & aneantist par trop d'aïses, de richesses, de bombances, d'orgueil & de superfluitez. Il n'est point besoin pour preuue de cela, d'entrer dauantage au denombrement de trente sept Empereurs Payens, qui ont esté aux premiers trois cens ans du Christianisme, depuis Auguste iusques à Constantin le grand, & de quarante trois Papes tous Saints & Martyrs, qui ont vescu durant ce temps, & d'infinis Euesques & autres Saints personages, vrayes exemplaires de sainteté & probité, qui ont vescu lors par tout le monde. Aussi peu est il besoin de raconter vn grand nombre d'Empereurs

heretiques, qui ont esté depuis Constantin iusques à Iustinian, & depuis luy iusques au declin de l'Empire Grec, en plus grand nombre beaucoup que de Catholiques : ny encores les Roys Vādales d'Afrique, ny les Roys Ostrogots de Rome, souz lesquels l'Eglise a le plus fleury, se conduisāns souz leur autorité, & par leur commandement, tant les Euesques, que les Papes, qui alloient en Ambassade pour eux, & les acceptoient pour arbitres & iuges, quād ils auoient quelques differēs, mesmes pour le Papat. Et pourroit on, si besoin estoit, adiouster vn long catalogue des Roys Arriens, qui ont regné sur les Hespagnes, depuis Alaric iusques au temps de Ricarede, & sur plus de la moitié des Gaules, depuis ledit Alaric, iusques au Roy Clouis, souz lesquels temps ont vescu infinis Prelats, & autres tant Ecclesiastiques que laiz, & vn bon nombre de Roys, Bourguignons, Lombards, Anglois, Escossois, Hōgres, Boësmiens, & d'autres nations, les vns idolâtres, & les autres heretiques, souz lesquels neantmoins ne laissoit de s'esleuer

& augmenter l'Eglise de Dieu, en tel nōbre & multitude, que soudain que lesdicts Roys se faisoient Chrestiens, leurs subiets sy trouuoient tellement disposez, que tout à coup leurs Royaumes entiers se trouuoient estre deuenuz Chrestiens. Or qu'un seul de tant de Roys & Princes mesmement heretiques, ayent esté excomuniez par les Papes & Euesques, ny qu'à leur adueu & par leur conseil leurs subiects se soient rebellez contre eux, il ne se trouue point par les histoires: ce que neantmoins ces saincts Peres n'eussent obmis à faire s'ils eussent estimé leur estre licité: car l'estant, cela estoit de leur deuoir, & n'eussent non plus crainct de l'entreprendre, que la plus part d'eux n'ot point douté de souffrir martyre pour la deffence de la vraye religion. Si on respond à cela par l'autorité des Canons, & mesmes de saint Augustin, que lors que le nōbre d'heretiques est si grand, que le remede de l'excommunication est dangereux, lors il s'en faut abstenir, de peur que voulant guairir le mal, on en irrite ou prouoque un plus grand, & qu'en

ce cas, il faut prier Dieu qu'il y mette la main : precepte que veritablemēt les Papes n'ont que trop sçeu mettre en vſage, n'ayans iamais excommunié les Princes & Republiques, ſinon quand ils ſe ſont eſtimez aſſez forts, pour deffendre par armes tēporelles leſdites excōmunicatiōs, leſquelles ils ont reuoqué tout court, lors qu'ils ſe ſont trouuez les plus foibles. A cela on peut repliquer, que l'eſtat de la France monſtre aſſez, & monſtrera de plus en plus, Dieu aydant, qu'à ce precepte & prudence de ſerpent, à ce coup les Papes Sixte & Gregoire ont grandemēt failly, comme auſſi leurs predeceſſeurs y faillirent grandement, quand ils excōmunierent le Roy Henry d'Angleterre, & les Princes d'Allemagne Proteſtans. Car il ſe void aſſez par experience, que ſans la mort de pluſieurs millions d'hommes, ces bulles ne peuuent eſtre executees, veu la reſiſtence qu'y font, & feront encores dauantage, non ſeulement tous les bons & naturels François, mais auſſi tous ceux des nations eſtranges, qui redoutent la Tyrannie Heſpagnolle. Et de-

uoit le Pape prendre garde, à ce qui s'estoit passé en France par l'espace des trente ans derniers, durant lesquels les feuz Roys Charles & Henry dernier, apres auoir remply de feu & de sang leur Royaume auparauant tresflorissant, imploré à leur secours toutes les forces estrâgeres, & employé tant la peau du regnard que du lyon pour exterminer ceux de la religion pretendüe reformee, neantmoins afin de ne voir en tout & par tout la ruyne finale de leur Estat, ont esté cōtraints par sept ou huiët fois assopir les guerres par Edits de pacificatiō. A plus forte raison deuoit ceste voye estre pratquee, maintenant que pour la deffence de ce Royaume, à ceux de ladicte religion, se sont ioincts les bōs Catholiques & vrays François, qui ont les yeux deffilleez, & recognoissent que ces troubles esleuez depuis trente ans souz pretexte de religion, n'estoit qu'une trame & planche artificiellement pratquee par les menées de ceux de la maison de Guyse, & les pensionnaires d'Hespaigne, pour sur icelle faire vn pont à leur ambition.

Je ſçay bien que contre les raiſons, au-
 thoritez & exemples cy deſſus alleguez,
 nos ergotiſtes & Docteurs ſubtils de ce
 temps, ont voulu apporter vne diſtinction,
 qu'il faut obeir aux Roys heretiques,
 quand ils deuiennent tels apres eſtre
 Roys, pource qu'eſtans eſtabliz de Dieu,
 on ne les peut priuer de leurs Eſtats, pour
 quelque faute qu'ils facent : Mais que ſi
 de perſonnes pures priuees, eſtans hereti-
 ques, ils veulent deuenir Roys, en ce cas
 il eſt licite aux peuples qui ne leur ont riẽ
 iurẽ, de les reietter & leur clorre la porte.
 Mais ceſte diſtinction eſt fort inepte &
 reiettẽe, tant par Sixte que par Gregoi-
 re, en ce qu'ils declarent par leurs bulles,
 noſtre Roy priuẽ non ſeulement du Roy-
 aume de France, mais auſſi de celuy de
 Nauarre, qui luy eſtoit acquis de longue
 main. Et auſſi par noz ligueurs rebelles,
 leſquels ont oſẽ declarer le feu Roy pri-
 uẽ du Royaume, qui luy eſtoit auſſi de
 longue main acquis. Auſſi que ceſte di-
 ſtinction ſeroit inepte en ce Royaume,
 qui n'eſt aucunement electif, & ne depẽd
 de la volontẽ des ſubiets, de receuoir &

repouffer le Roy, pource que si tost que le predecesseur a les yeux clos, le successeur entre en sa place, *ipso iure*, & comme on dit, *le mort saisit le vif*, sans qu'il soit tenu si bon ne luy semble, se faire coronner & sacrer : n'estans ces choses là que pures ceremonies, sans lesquelles il ne laisse de pouuoir exercer toutes les fonctions de Roy. Ayant esté la premiere vnction du Roy Clouis, comme chacun sçait, & la saincte Ampoule que nous lisons auoir esté apportee par vn Ange, introduite & employee pour seruir à son Baptisme seulement, & non pour ceremonie appartenant à sa dignité Royale : comme de faict aucun des successeurs de sa race, ne se trouue auoir esté oinct ny sacré apres luy, & fut ceste vnction seulement renouuelee, & remise en vsage par le Pape Zacharie, lequel estant venu en Frâce pour assister au coronnemēt du Roy Pepin, mit expressement ceste ceremonie en auant, non pource qu'elle fust necessaire à la dignité & maiesté des Roys, mais pour se dōner & à ses successeurs, vn acte de possession coloree, que c'estoit à eux à consta-

crer, & par consequent à installer les Roys, & en leur absence, aux Euesques leurs creatures: estant d'ailleurs certain, que de tous les Roys de la Chrestienté, plus de la moitié ne sont oincts ny sacrez, & ne laissent pour cela d'estre tenuz Roys: comme encor plusieurs de noz Roys (ie dis mesmes de ceux qui out esté depuis Pepin) ont demeuré cinq, six ou sept ans entiers, auparauant que se faire sacrer, & aucuns ne l'ont esté du tout: & neantmoins n'ont laissié de regner heureusement, & d'estre obeis par leurs subiects.

Ne sert aussi ce qu'aucuns des plus subtils disent, qu'en vn Royaume où l'heresie a esté de long temps establie, & où les Roys heretiques ont regné, il est permis de receuoir vn Roy heretique, pour ce que ce n'est point changement ny mutation. Car le contraire de ceste distinctiõ se voit en plusieurs histoires, & mesmes en celle d'Espagne, en laquelle apres que les Roys eurent esté par l'espace de cent ans Catholiques, au bout desdits cent ans, l'vn d'entre eux nommé Resecute, se
rendit

rendit Arrien, & furent ses successeurs Roys Arriens, tollerez cent ans durant, & obeis par leurs subiets Catholiques, comme encor Iulien l'Apostat, & plusieurs autres Empereurs heretiques, succedans à des Catholiques, ou des Catholiques dcuenans heretiques & Apostats, ne laissoient pas d'estre obeis par leurs subiets Catholiques.

Oultre les nullitez & iniustices cy dessus remarquees, si nous venons à examiner particulièrement lescdites bulles, nous y trouuerons plusieurs grandes absurditez, & faulces suppositions : & principalement en la bulle de Gregoire, contre les Ecclesiastiques, comme en ce qu'on presuppose faulcement, que nostre Roy apres la saint Barthelemy, fut sollemnellement instruit en la religion Catholique, apres plusieurs disputes publiques faites en sa presence, & à son instance, dans la grande Eglise de Paris, entre des docteurs en Theologie, & des ministres de sa religion.

En ce qu'il fonde la cause de son excommunication sur vn bruit commun,

disant que plusieurs des Ecclesiastiques, *ut fama est*, sont fauteurs & partisans du Roy, & à ceste occasiō les excommunie, qui est vne nullité & absurdité fort grande & remarquable. Car si par nostre droict canon, cōforme au ciuil, il est defendu d'excommunier personne, auant que la cause de l'excommunication soit vallablement prouuee, commēt se peut soustenir celle cy, qui n'est fondee que sur vn bruit public & incertain? *C'est chose griesue & indecente* (dit le canon) *de proposer vne sentence certaine, sur vne chose douteuse. Car combien que plusieurs choses soiēt veritables, toutesfois le Iuge ne les doit croire, si elles ne sont prouuees par certains indices.* Puis il adioust, *Dela, il faut entendre que l'iniuste sentence ne lie personne, ny enuers Dieu ny enuers l'Eglise. Il ne se faut donc abstenir de la cōmunion & conuersatiō de celuy, contre lequel il appert qu'une sentence inique a esté proferee.*

Mais c'est vne grande mocquerie, de reprocher à noz Roys decedez long tēps y a, & desquels la memoire est tref-louable & tref-illustre par tout le monde, que

Ca. graue
& seqq.
II. qu. 3.

pour se garentir à l'encontre des Roys d'Espagne , & autres ennemis de ceste Couronne, ils se sont associez avec les infideles & heretiques, & aydés de leurs secours: & par là se monstre euidentement, de quelle boutique vient ceste bulle, & quelle vient des Espagnols , qui sont encores vlcerez en leur cœur, de ce que noz Roys n'ont espargné aucuns moyës, pour se deffendre à l'encontre d'eux, & de leurs alliez & confederez. Mais ie leur demanderois volontiers , comment ils sont si oultreuidez , voire si impudens d'accuser noz Roys, d'un faict qui est, & a tousiours esté si cōmun à eux mesmes, tant ausdits Espagnols qu'aux Papes & aux ligueurs: car pour leur regard, ils n'ont iamais pensé estre si grand crime de se ioindre aux heretiques & aux infideles, qu'ils ne l'ayent prattiqué toutes & quantes fois que leur commodité la requis: tesmoins les Reistres & Enseignes de Lansquenets protestāts, qui ont tousiours composé plus de la moitié de l'armee du Duc de Mayenne, ont seruy d'escorte au Cardinal Caëtan, pour le conduire à Pa-

ris, & luy ont tousiours seruy de garde-corps, pendant qu'il y a esté, faisans leurs presches & leur Cenes dans les colleges de Paris, & y mangeans de la chair durât le Carefme, aux vendredis & autres iours deffendus: tesmoings aussi les Regimens de Frouberg, & autres Lutheriens, avec l'ayde desquels Charles le Quint, pere du Roy d'Espagne à present regnant, print & saccagea la ville de Rome, & y demurerent fort long temps pour prendre le Pape Clement, & les Cardinaux qui festoient sauuez au Chasteau saint Ange. Tesmoings encor infinis exemples des Papes, & autres Princes Catholiques, qui se sont liguez & entenduz avec les Turcs, contre les Chrestiens. Entre autres, Innocent & Alexandre sixiesme, qui receuoient du grand Seigneur Amurat, quarante mil ducats de pension par an, pour garder estroittement en prison close Gemin Othomã, frere dudit Amurat, de peur qu'il ne troublast son Estat, en faueur du Roy Charles huiëtiesme, & de ceux de Rhodes, qui l'auoient enuoyé audit Innocent à ceste fin: & se voyant,

Alexandre sixiesme , pressé par Charles huitiesme, de luy deliurer Gemin , à fin de s'en seruir à la guerre contre ledict Amurat (avec lequel ledit Pape auoit enuoie iurer ligue offensiue & defensiue, par vn sien agent, nommé Camille Pendon) il l'empoisonna : tesmoing encor Ferdinand & Alphonse Roys de Naples, qui auoient faict pareille ligue offensiue & deffensiue, avec ledit Amurat , contre ledit Roy Charles huitiesme : tesmoing aussi le Pape Iules deuxiesme , qui estant assiegé dans Boulongne par le Sieur de Chaumont , grand maistre de France, pendant qu'il le beffloit d'une esperance de paix , y fit introduire par Chapin Vitelli, vne compagnie de Turcs pour sa deffence , & infinis autres exēples qu'on pourroit adiouster, s'il estoit besoin.

Je ne puis en fin obmettre vne autre grande absurdité, qui est en ladite bulle de Gregoire treiziesme, qui dit que ceux qui auront encouru les peines contenües en ladite bulle, ne pourront estre absouls par autre que par le Pape, sinon en l'article de la mort, en baillant toutesfois cau-

tion d'obeir aux mandemens de l'Eglise: tellement qu'il pourra aduenir, qu'un pauvre simple & ignorant Prestre, ou autre Ecclesiastique, mourra en desespoir, à faute de pouuoir bailler caution: ce sont les effects de la charité paternelle de nostre saint Pere.

Voilà en somme les causes, raisons & moyēs, qui ont induit Messieurs du Clergé, conformément à ce que Messieurs de la Cour de Parlement auoient iugé, à declarer les bulles monitoriales du Pape Grégoire quatorziesme nulles & iniustes, & qu'elles ne peuuent lier ny obliger les Ecclesiastiques, ny tous les bons & vrais Catholiques, qui sont demeurez en l'obeissance & fidelité qu'ils doiuent à leur Roy. Mais d'autant qu'en leur Declaration il y a vne clause, laquelle pour n'estre bien entendüe, pourroit peut estre scandaliser les bons & fideles François, il me semble estre à propos d'en toucher vn mot. C'est qu'apres auoir déclaré lesdites bulles estre nulles & iniustes, tant par l'autorité de l'escriture sainte, que des saints decrets, Conciles generaux,

constitutions canoniques, & exemples
 des saincts Peres, droicts & libertez de
 l'Eglise Gallicane, ils adioustent l'impos-
 sibilité de l'exécution d'icelles bulles,
 pour les inconueniens infinis qui en en-
 suyuroient au preiudice & ruine de no-
 stre religion. Mais on feroit tort à ces
 bons Prelats, qui ont tant d'interest à la
 conseruation de cest Estat, & la plus part
 desquels ont volontairement abandonné
 tous leurs biens, leurs maisons & moyēs,
 pour n'adherer à ceste malheureuse con-
 spiration des ligueurs, d'estimer que pour
 excuse, ils voulussent se preualoir de la
 necessité & impossibilité. Car ce qu'ils
 ont mis en auant ladite impossibilité,
 c'est pour d'autant plus faire apparoir de
 l'iniustice de la bulle decernée contre
 eux. Et de faict, qu'elle iniquité plus grā-
 de peut on voir, que d'excommunier
 tous les Pasteurs, Prestres & autres Ec-
 clesiastiques des villes qui sont en l'obeis-
 sance du Roy, s'ils ne s'en retirent prom-
 ptement? N'ont ils pas plustost occasion
 de dire qu'ils veulent estre faits anathe-
 mes pour leurs freres, que d'obeir à cest

iniuste commandement, & laisser leurs troupeaux destituez de pasteurs, lesquels à la longue se voyans sans exercice de religion, seroient contrainsts de receuoir les Ministres de la religion pretendüe reformee, qui ne demanderoient pas mieux que de prendre leurs places vuides.

Or combien que pour refrener ces entreprises extraordinaires de ce cruel pere, Messieurs, noz Prelats & autres Ecclesiastiques assemblez à Chartres, eussent toutes les occasions du monde, d'imiter la vertu & rigoureuse feuerité de leurs predecesseurs, lesquels en semblables occurrences, se sont tousiours virilement opposez aux violences des Papes, reuoquans en doute, ou plustost reiectâs leurs qualitez de Papes, & appellans de leur intrusion au sainct siege, lors qu'il seroit remply d'une personne capable, ou bien au futur Concile : toutesfois mesdicts Sieurs du Clergé, traittans cetuy cy plus doucement, pour tascher quoy qu'en vain à le require à la raison, ou pour le mettre dauantage en son tort (combien qu'il ne puisse pis faire que ce qu'il a fait)

se

se sont contentez de declarer les bulles monitoriales nulles, avec protestation de ne se departir de l'obeissance du sainct siege Apostolic : & ont auisé de deputer soubs le bon plaisir du Roy, deux Prelats avec quelques autres du Clergé, pour aller vers luy l'inuiter à se recognoistre, quoy que le Parlement de Paris transféré à Tours, eust déclaré ledit Gregoire soy disant Pape, ennemy du Roy & du Royaume, & deffendu d'aller ou enuoier vers luy, sur peine de crime de leze Majesté.

Estant donc ledit Gregoire ainsi fauorablement traité par noz Prelats, & par eux recognu pour pere, combien qu'il ne les vueille recognoistre pour ses enfans, il a toutes les occasions du monde d'amander sa faute, & acquiescer à ce iugement si equitable, imitant le Pape Leon quatriesme, lequel se soubmit volontairement au iugement du Roy Loys deuxiesme, & de ses deputez, luy escriuât en ces termes, *Si nous auons fait quelque*

*Ca. nos s.
incompe-
tenter 2.
qu. 7.*

*lons que le tout soit amendé par le iugement de vous & de voꝝ deputez. Car si nous qui deuons corriger les fautes d'autrui, en mettons de pires: certes nous ne serons pas disciples de verité, mais (ce que nous disons avec douleur) nous serons par dessus les autres ministres de l'erreur. Partant nous implorons vostre clemence, à ce que pour s'informer de ce qui a esté dit cy dessus, vous enuoyez des personnes, lesquelles sur toutes choses craignent Dieu, & facent vne exacte perquisition de tout, comme si vostre Maie-
 sté imperiale y estoit presente.*

Mais d'autant que ledit Gregoire est totalement possédé par les ennemis de cest Estat, ie ne puis esperer aucun fruit du voyage que feront vers luy lesdicts Prelats: au contraire ils seront accusez de temerité, presumption & arrogance, d'auoir ozé prononcer cōtre leur supérieur, qui a droict de iuger vn chacun, & ne peut estre iugé par autrui. On leur dira dauantage, qu'il ne leur a esté loisible de s'assembler sans l'autorité du Pape, auquel seul & non au Roys, appartient d'indire assemblees de Clergé, pour auiser à

la police & discipline Ecclesiastique, estant l'Empire diuisé entre les Princes de la terre, & luy qui a pour son partage le Ciel, c'est à dire pleine puissance & iurisdiction, tant temporelle que spirituelle, sur les personnes Ecclesiastiques, & eux la simple intendance & iurisdiction temporelle sur les subiets laiz : encores dira-l'on, qu'ils ont puissance non seulement du glaiue spirituel, mais aussi du temporel sur les Roys & leurs Royaumes, suyuant la constitution de Boniface, dont il a esté parlé cy dessus. Or combien que ce qui a esté deduit par cy deuant, puisse suffire pour responce à ces fauces, vaines & imaginaires presuppositions, toutesfois il me semble n'estre hors de propos d'en discourir plus amplement, & par mesme moyen parler sommairement des droicts de la France, & libertez de l'Eglise Gallicane.

Il n'y a personne qui ne sçache quelle est la charge, l'autorité & la puissance des Roys & Princes souuerains, lesquels Dieu a esleuez sur la terre, pour estre cōseruateurs & intendans generaux du biē,

repos & vtilité publique , sans que nul de
 ceux qui vivent sous eux , se puisse pre-
 tendre exempt de leur sur-intendence &
 sur-veillance, de quelque estat , qualité &
 condition qu'il puisse estre : voire d'autât
 plus aucuns de leurs subiects , à cause de
 leur rang, degré & fonction, sont vtiles &
 nécessaires pour la conseruation du re-
 pos des autres, plus il touche aux Roys en
 ladite qualité d'Architectes generaux,
 de bander leur soing & sur-veillance sur
 eux, & auoir l'œil ouuert sans cesse , à ce
 que faisans dignement leurs charges , ils
 facent entierement reüssir leur talent, au
 bien, repos & vtilité publique. Or com-
 me ainsi soit que de toutes les fonctions
 seruantes à vn Estat, la plus digne, vtile &
 nécessaire, soit celle des Ecclesiastiques,
 qui ont charge de conduire les peuples, à
 la felicité terrienne & celeste , il s'ensuit
 que plus sur ceste qualité de personnes,
 que sur nuls autres , les Roys , Princes &
 Magistrats souuerains , doiuent veiller &
 faire garde tres-exacte. Ce n'est point
 pour cela que ie vueille dire ce qu'aucuns
 ont trop indistinctement proferé , que

lesdits Roys & Princes souuerains, soient en leurs Estats priuatiuement à tous autres, Chefs vniques & absoluts de l'Eglise, & de tous les Ministres d'icelle : car pour le regard de ce qui concerne le maniement des choses purement sacrees, comme l'administration de la parole de Dieu & des sacremens, & la puissance de lier ou deslier, voire de regler en particulier le dedans de chacune Eglise, la surintendance en appartient aux Euesques, & autres Chefs de la Hierarchie Ecclesiastique, à chacun selon leur rang & degré. Mais tout ainsi qu'au maistre Architecte & entrepreneur d'un edifice, il n'appartient point de manier les vstils, ny donner les loix & preceptes aux ouuriers, selon lesquels ils les manieront, ils laissent cela à chacun d'eux en particulier, & en general aux maistres iurez de chacun art : ce qu'ils doivent faire, c'est de donner la loy à tous ensemble, les guider, regir & controller, à ce qu'vns tous avec diligence & loyauté, de l'industrie que leur apprend leur mestier, ils apportent de bonne foy, ce qui est en

eux, à l'eleuement & aduancement de l'edifice, selon les proportions & alligemens qui leur sont donnez. Ainsi aux Roys Architectes, generaux comme i'ay dit, du repos commun, & pour tels recognoz par tous les sages qui en ont escrit, il n'appartient point de manier les choses sacrees, ny supporter, comme l'on dit, l'arche d'alliance, ils doiuent laisser cela à ceux de la vacation, mais ils peuuent, voire sont tenuz deuant Dieu, veiller sans cesse, & auoir l'œil ouuert à ce que ceux de cest ordre & profession principale, aussi biē que ceux des autres moindres, apportent en loyauté & saine conscience, tout soing, diligence, pureté & sincerité, au maniement des charges à eux commises, conformément à leurs loix, reigles & canons : lesquels au cas qu'ils seroient negligez & effacez par la rouille de l'âtiqité, ou que pour la malice des hommes, il fut besoing d'en faire de nouueaux, ils sont tenuz vser de leur puissance, pour y apporter remedes conuenables, soit par Synodes assemblez de leur authorité, soit par leurs ordonnan-

ces & pragmatiques, soit par leurs iugemens, arrests & executions d'iceux. C'est ce qu'en France noz predecesseurs ont tousiours appellé la police exterieure sur l'Eglise, de laquelle les Empereurs, Roys & Princes ont vsé & iouy sans contredit, tant que l'Eglise s'est conseruee en sa pureté, & qu'aucuns d'icelle ne se sont ingerezz sortans de leurs bornes & limites, d'vsurper les fonctions Royales. C'est ce qu'il nous est enseigné par les canons, qui disent que *Les Princes seculiers souuent en l'Eglise, exercent la puissance qui leur est attribuee, à fin que par icelle ils conseruent la discipline Ecclesiastique, & ce que les Prestres ne peuuent par leurs parolles & doctrine, la puissance seculiere le commande par la terreur de la discipline.*

ca. principes se-
culi &
ca. administrato-
res 23.
qu. 5.

Pour plus ample preuue de cela, nous pouuons amener vne infinité d'exemples de l'antiquité. Car c'est chose toute notoire, que depuis que les Empereurs furent deuenuz Chrestiens, iusques au declin de l'Empire, ils se sont tousiours maintenuz & conseruez en la possession, d'auoir l'intendance iurisdiction & poli-

ce exterieure sur l'Eglise, aux ministres & instrumens de laquelle, laissant ce qui estoit de leur vacation, sçauoir est le maniement des choses purement sacrees, au parfus, cōme Architectes generaux, ils tenoiēt la main, à ce que lesdits Ecclesiastiques facquittans dignement de leurs charges, & se cōtenās dās les bornes d'icelles, sans se detracquer ny eniamber les vns sur les autres, ny aucūs d'eux sur l'autorité des Magistrats, ils apportassent ce que chacun d'eux deuoit pour sa part, à l'entretiē de la societé ciuile, maintenüe sur tout, par l'obeissance deüe aux Magistrats, ensemble à l'auācemēt de l'hōneur de Dieu & de son Eglise, excluās d'icelle à ceste fin, toutes nouueautez, corruptelles & entreprises vniques. Et pour cet effect, conuoquans ou faisans conuoquer en temps d'heresies des Conciles generaux de demy an en demy an, à tout le moins des nationaux ou prouinciaux, pour sacler les maluersations & coustumes vicieuses, qui par le temps couloient en l'Eglise. Ausquels Conciles principalement generaux, ils assistoient en personnes,

sonnes, ou faisoient assister leurs principaux officiers, qu'ils appelloient *iudices gloriosissimos*, pource qu'à eux touchoit de tenir la main, à ce que toutes choses y allaissent bien, sans brigues, violence, tyrannie ou faueur. Que si aucuns pour auoir delinqué ou peché contre le deuoir de leurs charges, meritoient estre chastiez, reformez ou deposez, ils tenoiēt la main à ce qu'il y fut pourueu par les Prelats, & en cas de conuiuece ou negligence, ils y faisoient pourueoir ou y pouruoioient eux mesmes, assemblans à ceste fin, ou faisans assembler lesdits Synodes, ou tenans eux mesmes des pragmatiques, esquelles par auis des Prelats & officiers de leurs Empires, estoit remedié à toutes defformitez & corruptelles, & les choses remises en leur estat, tant par bonnes loix & constitutions, que par iugemens graues & sinceres: tenans aussi la main à ce qu'aux eslections des charges Ecclesiastiques, mesme de la supreme de toutes, il fut procedé en toute sincerité & liberté, à ce presens & assistans leurs principaux officiers, & icelles esle-

ctions confirmoient & infirmoient, selon qu'ils ingeoient le deuoir faire. Mais sur tout pouruoyoiēt à ce que l'auarice ou intemperance d'aucuns particuliers, n'introduisist quelques monstres ou corruptions en l'Eglise, & à ce qu'aucuns par ambition, orgueil ou autre cupidité, ne s'attribuaissent plus d'autorité qu'ils ne deuoiēt auoir, entreprinssent sur les charges les vns des autres, ou sur celles des Magistrats laiz, ains que suyuant le precepte diuin, chacun se contiinst en son deuoir, avec modestie, continence & humilité, laissant à Cesar ce qui estoit à Cesar, & à Dieu ce qui estoit à Dieu.

Ce que dessus se peut clairement verifïer, non seulement par les anciens Cōciles, que nous voyons auoir esté indits par les Empereurs, & ausquels ils ont presidé, & par les histoires Ecclesiastiques, mais aussi par le droict ciuil & canon. Car nous voyons le Code de Iustiniā & ses nouuelles remplis de plusieurs loix & constitutions faites pour la police & discipline Ecclesiastique, & principalement les quinze ou vingts premiers til-

tres du premier liure dudit Code, & les
nouuelles 3. 5. 6. 16. 46. 56. 57. 58. 59.
67. & 83. La plus part desquelles loix &
constitutions, tant de Iustinian que des
autres Empereurs, sont approuuées par
les Papes, & inferées au grand decret, ou
cōme on dit communement canonisees,
& encores la nouvelle dudit Iustinian,
2 3. par laquelle il deffendoit aux Eues-
ques & autres, d'excommunier person-
ne auparauant que la cause de l'excom-
munication fut aprouuee & verifiee, ad-
ioustant que si aucun estoit si hardy d'ex-
communier autrement, l'excommunié
seroit absouls, & l'excommuniant ex-
communié luy mesmes : laquelle loy est
aprouuee par le canon *de illicita* 24. qu.
3. Et en la 5 3. dist. le Pape Gregoire le
grand, mande aux Euesques d'Italie, de
garder inuiolablement la loy faicte par
l'Empereur Maurice, par laquelle il def-
fendoit de receuoir les soldats & les cō-
ptables à estre clerics ou moynes, & par le
canon *principali* 65. dist. de l'ordonnance
de l'Empereur, certains particuliers ont
esté promeuz aux ordres sacrez. Mais ce

*Ca. si quis
cum cle-
rico* II.
qu. 3.

qui est encores plus remarquable, c'est que l'Empereur Honorius à l'instance & priere du Pape Boniface, fit deux loix, par la premiere desquelles, fut ordonné qu'à l'aduenir les Papes ne seroient creez par ambition: & par l'autre, que si deux sont creez à vn coup par brigues, en ce cas ny l'vn ny l'autre ne demeurera Pape, mais sera procedé à nouuelle eslection, comme il appert par le canõ *Ecclesia*: & le ca. *viator* 97. *distinct.* & par le ca. *si duo*, 79. *distinct.* Et par le ca. *satagendum* 25. qu. 1. le Pape Pelagius pour se purger du soupçon d'heresie enuers le Roy Childebert, luy rend compte de sa foy, recognoissant que les escriptures sainctes luy commandent d'obeir aux Princes souuerains. Et ne sert que la glose contraire au texte, dit que les Papes ne sont subiets aux Roys, que pour le payement des tributs: car il n'estoit point question de tributs, mais seulement de se purger du crime d'heresie.

Tel donc a esté aux premiers temps le soin des Empereurs sur l'Eglise, tel le reiglement entre le pouuoir des Princes &

Magistrats seculiers , & des personnes Ecclesiastiques. Quoy estant la sincerité de l'Eglise , & par consequent le bien & repos public , se sont heureusement conseruez, sans que par troubles semblables aux nostres, ou autres dereglemens quelconques, prouenans pour la pluspart du mespris & mauuaise intelligēce des subiets vers leurs superieurs, ils se soiēt veuz en rien alterez, bien qu'assez d'occasions s'en offrissent, veu les heresies & opiniōs differentes, qui lors trauailloiēt la Chrestienté. Depuis que par les inondations de l'Europe par plusieurs nations estrangeres, comme Gots, Vandales, Hongres Sueues, Bourguignons, Frāçois & Lombards, l'Empire vint à se desmembrer, & principalement l'Italie, dont la pluspart se soubstrahit des Empereurs, ce nerf de l'vnion publique, qui iusques alors auoit contenu toutes sortes de subiets, de quelque condition qu'ils fussent, sous le gouvernement d'un seul chef, commença bien fort à se lascher, d'autant que les Euesques de Rome, qui au precedent estoient contentez d'auoir obtenu, non

sans tres-grande peine & contradiction,
 la preſeance & ſuperiorité ſur tous les
 autres Eueſques d'Occident, commēce-
 rent à l'occaſion deſdites diuiſions &
 troubles, à monter plus hault qu'aupara-
 uāt: ce qui leur fut facile d'obtenir, pour-
 ce que quāt à la ville de Rome, & la plus
 part de l'Italie eſtant lors la domination
 d'icelle continuellement debatüe & agi-
 tee entre ces nations eſtranges, qui s'en-
 trechafſoient les vns apres les autres, &
 n'oſoient neantmoins ceux d'entre eux
 qui en emportoient le deſſus, ſarreſter
 ſeuřement dedans la ville de Rome, à
 cauſe de ſa foibleſſe expoſee à l'iniure de
 quiconque tiendroit la campagne, tel-
 lement que les Papes ſeuls y reſidoient
 ſans en bouger, pour quelque change-
 ment qui y aduint, pour ce qu'à cauſe de
 la reputation tres-grande, que leur ac-
 queroit leur ſaincteté apparēte, ils eſtoiēt
 reſpectez meſmes par les barbares) peu à
 peu il aduint que leſdits Papes ſacquirēt
 ſur ladite ville, & par ſucceſſion de temps
 ſur les enuiron d'icelle, tant de credit,
 pouuoir & authorité, que ſoit par bien,

seance ou par droict de deference ils s'en firent à la longue recognoistre pour Seigneurs & Maistres. Et pour le regard des autres Estats & pays, tant de l'Italie que du reste de la Chrestienté, estans diuisez entre plusieurs Roys & Princes, & ne restant plus d'Empereur vnique sur le tout, qui seul peust retenir la police & surintendance vniuerselle sur l'Eglise (ce qui neantmoins estoit iugé necessaire, soit qu'un Prince lay l'eust ou vn Ecclesiastique, à fin de maintenir l'vnion de l'Eglise souz vn chef, & empescher que souz plusieurs, elle ne fut diuisée en diuers scismes) les seuls Papes, comme les plus emmens de tous les Prelats Ecclesiastiques, se trouuerent plus propres que nuls autres à occuper ceste place de chef, & par ce moyen supplanterent vne partie de l'autorité que les Empereurs auoient eu sur l'Eglise, & en frustrerent facilement les autres Princes laiz & Potentats : sur lesquels ayans emporté cest auantage tout à coup, peu à peu ils en gagnèrent assez d'autres, pour ce que s'estans à cause de la multitude & diuersité desdits.

Princes, engendré avec le temps, plusieurs diuisions entre iceux Princes, il fut tref-facile ausdits Papes, pour la grande créance que peu à peu ils acquirent, tant à cause de leur saincteté extérieure & apparente, que pour le pouuoir qu'ils auoient sur les consciences des hommes, de se rendre iuges, arbitres & determinateurs de leurs differens, faisans tomber, la pluspart du temps, le droict ou le tort, la victoire ou la ruine, de telle part que bon leur sembloit, pour l'assistance qu'ils se faisoient faire par les Princes & peuples Chrestiens, souz couleur de pieté & de religion: dont peu à peu ils se rēdirent formidables, & acquirent vne tref-grande puissance, pource que comprans pour tiltres infaillibles, & actes de possessions irrefragables, tout ce qu'on leur auoit deferé volontairement, & ce qu'à la priere & suscitation des vns ou des autres, ils auoient oncques entrepris, embrassé, geré, négocié, conseillé, composé, décidé ou iugé entre diuers Princes, peuples ou personnes, fut en affaires temporelles ou spirituelles, & de tous les exemples

ples qu'ils en auoient soigneusement ramassé, en ayans recueilly des maximes & loix generales, ils en bastirent en fin vn Empire absolu, & de simples arbitres, amiables compositeurs, peres communs, surueillans, & exhortateurs qu'ils festoiēt portez du commencement, ils deuindrēt non seulement primats de toute l'Eglise, mais pied à pied Euesques vniuersels, ne tenās les particuliers q̄ pour leurs vicaires & lieutenans, se mirēt au dessus de toutes los loix, canons & Conciles, non subiets à reprehension ou correction, & en brief establirent leur puissance purement absolüe, & non subiette aux loix, non seulement sur le temporel de l'Eglise, mais sur les Monarchies, Empires, Royaumes, & autres Estats de la Chrestienté, dont ils se qualifierent fondateurs, collateurs & inuestiteurs: & pour comble de tout Lieutenans icy bas, & vicaires absoluts de Dieu sans restriction, pour les choses tant du ciel que de la terre. Pour à quoy paruenir, ils furent sur tout aydez par la reduction au Christianisme de plusieurs tres-grandes & tres-puissantes nations,

comme de l'Allemagne, Pologne, Hongrie, Suede, Danemarch, Angleterre, Bulgarie, & le recouurement de l'Espagne, Portugal, Sicile, Naples, Corse, Sardaigne & autres pays, de l'oppression des Sarrazins, lesquels estans aduenuz enuiron le mesme temps que les Papes establissoient peu à peu pour leur grandeur, ces maximes & tiltres auantageux, avec resolutiõ de s'en faire croire, en mesure que ces peuples entendoient à se cõuertir à la vraye foy, & qu'ils en goustoiẽt le premier laict, les Papes diligens à telles choses leur enuoyoient des Legats & Nunces, qui leur faisoient avec la pieté succer leurs maximes & tiltres (comme ils font maintenant à ceux des Indes) dõt il leur estoit mal-aisé se deffendre, en ce premier aage & tendresse, & lors qu'ils estoient encores Neophiles, & par consequent ignorans du droict Chrestien, estably par les canons & Conciles, & qu'il ny auoit aucun moyen de les conseiller & redresser au contraire, estant pour lors manque, tary & defaillly, le seul vray & legitime remede contre telles en-

treprinſes & vſurpations : qui euſt eſté la
 tenüe des Conciles generaux , pour ce
 que n'y ayant plus d'Empereurs vniuer-
 ſels , ains pluſieurs Roys qui tiroient les
 vns d'un coſté, les autres de l'autre , il ne
 reſtoit pour cet effect que les Papes meſ-
 mes qui ſe gardoient bien d'ouurir les
 Conciles: dont il aduint que ces nations
 nourries en leurs premiers aages , en ces
 maximès confortatiues de la dominatiõ
 abſolüe des Papes , en meſure qu'elles
 croiſſoient en la creance & foy Chreſtiẽ-
 ne, deuenoient non ſeulement tref-obeif-
 ſantes, & du tout eſclaues au ſiege Papal,
 mais vrais arcs-boutans, réparts & cham-
 pions de leur domination & puiffance
 abſolüe, contre quiconque y euſt oſé cõ-
 tredire. .

Tels ont eſté les moyens en general,
 avec leſquels la puiffance des Papes eſt
 montee au degré où on la voit. Car quant
 aux moyens qu'ils ont tenu en particu-
 lier, il ſeroit trop long de les reciter. Il me
 ſuffira d'en raconter d'infinis vn ou deux,
 ou trois au plus , qui ont frappé les plus
 grands coups & plus ſignalez. L'un des

premiers fut la diuision & mauuais menage, d'entre l'Empereur Grec Phocas & ses subiets, pour la trahison & meurtre par luy commis, sur l'Empereur Maurice son maistre, occasion pour laquelle se voyant abhorré de la pluspart de ses subiets, à fin d'estre supporté contre eux par saint Gregoire, grand ennemy dudit deffunct, & depuis par le Pape Boniface son successeur, & obliger lesdits deux Papes à deffendre & soustenir sa cause, il leur adiugea ce nom venerable de Papes priuatiuement à tous autres Euesques, encores qu'au parauant il eust esté commun à tous, ensemble la presepance sur les Patriarches de Constantinople, qui leur auoit esté fort long temps debatiue, & la qualité & tiltre d'vniuersels, laquelle neantmoins il accorda quant & quant ausdits Patriarches de Constantinople, à fin de ne les perdre du tout, & de leur oster en partie occasion de se plaindre.

L'autre second coup, fut la donation pretendüe faite par Haribert Roy des Lombards, enuiron l'annee 700. au Pape Gregoire deuxiesme, des pays de la riuie-

re de Gennes, depuis confirmee & rati-
 ficee par Luisprant, l'un de ses successeurs:
 qui fut la premiere domination terrien-
 ne, dont il se lit que les Euesques de Ro-
 me ayent oncques esté vestus & saisis, par
 le moyen de laquelle, & de la consequen-
 ce qu'elle apporta, pour plusieurs acquisi-
 tions semblables, qui peu apres s'en en-
 suyuirēt, les Papes successeurs, ainsi qu'es-
 cript vn de leurs grands flatteurs Gonca-
 lo de Illescas, historien Espagnol, com-
 mencerent à s'enhardir, de conforter, &
 faire espaule par les armes & forces tē-
 porelles, à leurs foudres spirituels, c'est à
 dire à leurs excommunications & inter-
 dictions, qui iusques à lors, dit le mesme
 auteur, à cause qu'elles ne tiroient point
 de sang, auoient esté foibles & mespri-
 sees. Ce qui apparut bien tost apres: car
 Gregoire troisieme son successeur im-
 mediat, commença le premier de tous les
 Papes, à oser darder la premiere excom-
 munication majeure & interdiction, dont
 oncques l'Eglise ait osé vser contre les
 Empereurs ou autres Princes. Ce fut cel-
 le qu'en l'année 716. il sefforça (biē qu'en

vain toutesfois, comme il a esté dit cy dessus) de fulminer contre l'Empereur Leon Iconomaque, qu'il declara interdit & priué de ses Estats, dont les Grecs subiects dudit Empereur se mocquerēt. Mais quant audit Pape, il se sceut tref-bien preualoir de ce pretexte d'interdiction, pour les pays qui estoiet en sa bien-seance : entre autres la Romagne & Rauenne: car il les partagea indignement (luy qui auoit esté iuge & partie) avec le Roy des Lombards. Au moyen dequoy il vestit des esprits, & vne hardiesse encore plus grande, & iusques à lors inouye en la Chrestienté, du tout contraire à l'humilité des Apostres. C'est que luy premier de tous ses deuanciers, entreprinist de desguainer le cousteau, & manier les armes temporelles, dont il commença son coup d'essay, sur la ville & Chasteau de Cumes, appartenans au Duc de Beneuent, qu'il enleua sur luy par forces d'armes, avec grand meurtre & occision de personnes. Depuis lequel temps, croissant à veüe d'œil, & de iour en iour, l'autorité, terreur & puissance de ce Pape, & de ses autres suc-

cesseurs, ores par donations qu'ils se fai-
 soient faire, ores par cōquestes des Estats
 d'autrui, ores par le maniemment de leurs
 glaiues spirituels, & tenans par moyens
 extraordinaires, non seulement toute l'I-
 talie, mais tous les autres païs de la Chre-
 stienté en diuision & combustion, ils se
 sont leuez peu à peu, en ce haut degré,
 tant au temporel qu'au spirituel, auquel
 nous les voyon sauourd'huy : iusques là,
 qu'apres auoir diuisé par vne guerre,
 qu'ils ont maintenüe quasi continuelle
 par l'espace de trois cés ans cōtre les Em-
 pereurs d'Occident, l'Italie & l'Allema-
 gne, & infinies petites dominations, &
 auoir chassé dudit pays d'Italie, non seu-
 lement lesdits Empereurs, mais tous au-
 tres qui leur pouuoient faire teste, voire
 du tout aneāty les Empires tant d'Orient
 que d'Occident, l'vn estant rendu esclau
 des infideles, & l'autre esparpillé en tant
 de petites seigneuries, que l'Empereur
 n'y est plus, que comme vn o en chiffre,
 & vn ombre vaine de dignité, ils ont mis
 toutes choses tellement souz leurs pieds,
 qu'au moindre Pape depuis deux cens

ans en çà, qui ait eu loisir de regner trois ou quatre ans, il a esté facile d'acquérir pour ses nepueuz ou autres parens, comme par effect tous les Papes ont quasi acquis, vne ou plusieurs souuerainetez en Italie, soit par en deietter les vrais & legitimes proprietaires avec armes ou par argent, ou par opprimer & assubiettir aucunes Republiques, festans d'ailleurs de tous les Royaumes de la Chrestienté, trouué peu ou point du tout, ausquels ils n'ayent imprimé les marques de leur superiorité & domination, soit en les mettant sous leur tribut & recognoissance, ou les rendans pour le regard du spirituel, voire en plusieurs points du temporel, pays de leur obeissance.

La seule Frâce quasi de toute la Chrestienté, fest vn bien fort long temps conseruee en la liberté Ecclesiastique, dont le reste du monde iouyssoit du temps de ces premiers Empereurs : & pour ceste occasion à sa difference, & de ce que seule entre toutes les autres nations, elle maintenoit ce qu'on appelle de tout tēps les libertez de l'Eglise Gallicane, à l'exē-
ple

ple de celles de l'Eglise Affricaine, dont il est parlé en l'Epistre Synodale du Cōcile de Carthage sixiesme, on a appellé les autres Estats & Royaumes, pays d'obediencē, pource qu'ils ont laissé perdre peu à peu les libertez de leurs Eglises, par les moyens que nous auons dit : les vnes pource que lors qu'elles estoient encores Neophiles, elles ont prins tel ioug, qu'il a pleu aux Papes, les autres pour auoir esté asseruies par leurs armes & forces temporelles, ou d'aucuns Princes qui leur auroient assisté, les autres pour ce que cedās à leurs fouldres spirituels, auxquels ils n'auoient osé ou peu resister, ils se feroient laissez subiuguer : & les autres pource qu'afin d'estre portez & secouruz par lesdits Papes, contre aucuns leurs ennemis plus forts qu'eux, ils auroiēt faict le traict du cheual d'Horace, ils se feroient mis sous leur protection, voire subiection & domination.

La liberté de la seule Eglise Gallicane, par quel moyen elle fest tres-longuement maintenüe, & quels effects elle a engendré, il seroit trop long à le discou-

rir: ie me contenteray de dire en brief, que festans noz Roys tousiours maintenuz en vne puissance tres-solide & entiere, tant par la force de leurs armes, que par la bien-veillance de leurs subiets, & par la bonne constitution de leurs loix & polices, soigneusement maintenües par leurs Parlemens, il a esté tres-long temps difficile aux Papes, quelques efforts qu'ils ayent apporté, quelques censures & excommunications dont ils ayent menacé, soit noz Roys, les Prelats ou les Officiers du Royaume, d'entamer quelque chose sur l'ancienne liberté, tant de l'Eglise que de la Couronne, qui s'est trouuee tellemēt florissante durant la premiere, & le commencement de la deuxiesme race, que les Roys toutes & quantes fois qu'ils ont trouué estre necessaire, ont indict & assemblé de leur autorité des Conciles, ausquels ils ont presidé ou faict presider qui bon leur a semblé, soit pour y resoudre des points & articles de foy, soit pour y establir des decrets & reglemens sur les choses & personnes Ecclesiastiques, mesmes chastier & priuer ceux qui auoient

failly. Le premier desdits Cōciles fut celebré à Orleans, par le commandement du Roy Clouis, auquel assisterent trente trois Euesques, & y furent faits trente trois canons, quasi tous inferez au grand decret, & sont tout au lōg à la fin du premier tome des Cōciles. Charlesmagne en fit celebrer cinq, le premier à Magonce, le deuxiesme à Rouën, le troisieme à Rheims, le quatrieme à Chalōs sur Saone, & le cinquiesme à Arles: & Loys le Piteux vn à Aix en Prouence, où il defendit aux Euesques & autres personnes Ecclesiastiques, de porter robbes de soye, comme recite Platine en la vie de Gregoire quatrieme. Et oultre lesdits Roys Charlesmagne, Loys le Piteux & Lothaire, establirent plusieurs ordonnances & loix Ecclesiastiques, tant sur la doctrine Chrestienne & sacremens, que sur les personnes Ecclesiastiques & Euesques (qui se trouuent encores auiourd'huy, & sont intitulees les capitulaires) ausquelles Leon quatrieme, par son Epistre escripte audit Roy Lotaire, inseree au grād decret, promet d'obeir, & icelles faire in-

Ca. decapitulis 10. dist.

ca. A-
drianus
63. dist.

uiolablement garder & obseruer. Ont
aussy nosdits Roys tenu la main à l'esle-
ction des Euesques, Abbez & autres Pre-
lats, & mesmemēt les Papes, qu'ils ont eu
droict d'eslire, comme il appert nō seule-
ment par noz histoires, mais aussy par les
canōs, ont fait receuoir ou reietter selon
que leur Clergé, leurs Parlemens ou leur
Conseil l'ont trouué raisonnable, les de-
crets, canons & Epistres decretales des
Papes, & les Conciles tenuz hors de Frā-
ce, ont condamné les vsurpations & en-
treprinſes de la Cour de Rome, tant sur
l'autorité de leurs Magistrats & offi-
ciers, que sur le temporel de l'Eglise, les
imposts, subsides, decimes & autres de-
uoirs, tant sur le Clergé, qu'autres per-
sonnes layes, comme les croisades, colle-
ctes de despouilles des beneficiers dece-
dez, legitimations, creations d'officiers,
qu'aussy sur le spirituel, cōme les excom-
munications venantes de Rome, les en-
uoys des Legats en France, sans le congé
& permission des Roys, entreprinſes de
iurisdiction sur les ordinaires, fust *extra*
partes, ou autrement, collations tant de

benefices electifs en tout cas, que de collatifs par preuention, ou autrement à l'exclusion des ordinaires, vnions indeües, translations, desmembremens ou erections d'Eueschez, impositions d'annates, ou autres charges & deuoirs excessifs, dispenses & autres concessions faites hors des cas de droict, & compositions prises pour icelles, pensions sur Eueschez, cures & autres benefices ayans charge d'ames, à quelques sommes qu'elles puissent monter, & sur autres benefices excédans le tiers, suyuant les coustumes de la France, reserues, mandats de *prouidendo*, graces expectatiues, coadiutorries, reseruations de certains mois, prouisions portans clauses *anteferri*, ou autres semblables entreprinſes sur les patrons laiz ou Ecclesiastiques, concessions derogeãs à la pragmatique, cōcordat, & aux priuileges des vniuersitez, ou autres corps, commutations de testamens ou fondations, introductions de nouueaux ordres & colleges, exemptiōs octroyees à personnes quelsconques de la iurisdiction ordinaire, & en general toutes clau-

ses & concessions, portans contrauention aux Conciles generaux ou particuliers, saincts canons ou decrets anciens, pragmatiques, ordonnances, arrests, Coustumes & droicts du Royaume.

Et quant aux effects que telles libertez ont engēdré, il nous suffira pour cest heu-
re d'ē deduire deux tāt seulemēt, d'un nō-
bre infiny qu'ō en pourroit reciter. C'est
que tant que lesdites libertez ont esté
pleinement conseruees, ce qu'un ancien
a iadis prononcé a tousiours eu lieu, *Sem-
per Gallia caruit monstris*, il ne sy est veu
aucune heresie, pource que la pureté de
la discipline, & la saincteté des Ministres
de l'Eglise, se conseruans par le moyen
desdites libertez, & de la sur-veillance
des Roys, sur l'ordre Ecclesiastique les en
chassoit. L'autre que par le moyen aussi
d'icelles libertez, les personnes Ecclesia-
stiques estans retenües sous l'autorité,
correction, & planiere disposition de l'E-
glise Gallicane, c'est à dire ne sortans du
Royaume, pour aller chercher leur supe-
rieur, sinon en certains cas fort rāres, il
n'est point aduenu ce qu'on a veu depuis

aduenir, & dont procede aujourd'huy le fonds de noz maux, que ceux de l'ordre Ecclesiastique, plus puissant en effect que les deux autres ensemble, par le moyen, tant de la clef des consciences, que de l'eloquence & droict de prescher en public, estant commandé & manié à baguetté par les Papes, ait esté cause toutes & quantes fois qu'il auroit pleu ausdits Papes, d'attirer toute la France sous leur obeissance, par ces deux cordelles inuisibles de conscience & persuasion, & en ce faisant les contraindre au plaisir & vouloir desdits Papes, de changer leur Roy legitime & naturel, à tel autre vsurpateur que bon leur sembleroit, tantost à vn vieil Cardinal, ou plustost à vn Duc de Guise, tantost à vn Duc de Sauoye ou de Lorraine, & tantost à vn Espagnol, qui rendroit la France colonie des Maures & Indiens, & la manieroit à la Flamende ou Portugoise, couperoit peu à peu les testes des pauots, c'est à dire des personnes nobles & genereuses, & le reste du vil & abiect populace, les feroit passer par bastellees aux Indes, pour y fouil-

ler les mines & pescher des perles.

Tels donc que nous auons dit, ont esté pour vn tres-long temps, les effects de l'autorité entiere de noz Roys, & des libertez de l'Eglise Gallicane, tant que pleinement elles ont esté maintenües, & ont les François tant que cela a duré, eu ce bien que de se rendre spectateurs oisifs des miseres & calamitez des autres Estats, ruinez pour la pluspart par le faict des Papes, comme entre autres la Grece, l'Italie, l'Allemagne, l'Angleterre, la Sicile, le Portugal, & vne bõne partie de l'Espagne, Nauarre, Boësmes, & tout l'Orient, & en general quasi toutes les autres nations & Estats, parties desquels ont esté dissipez ou asseruis par les Papes, ou par d'autres à leur appetit, ou abandonnez à la proye des infideles, à faute du secours des autres Princes Chrestiens, empeschez par des guerres intestines, nourries entre eux par lesdits Papes. La France seule parmy tant de ruines & mutations, festant tellement conseruee, que de tous les Royaumes du monde, il n'y en a aucun si ancien de la moitié,

moitié, c'est à dire qui se soit tousiours
maintenu en son entier, sans auoir chan-
gé de loix, & forme d'establissement &
de police.

Ce n'est pas pour cela que ie vueille
dire, que les Papes n'ayent souuēt eniam-
bé & entrepris, tant sur l'autorité de
noz loix, que sur les libertez de nostre
Eglise: lesquelles encores telles què nous
les auons auioird'huy, sont grandement
decheües & abastardies, au pris de ce
qu'elles ont esté par le passé. Mais cela
s'est fait avec tant de resistance & diffi-
culté, & par fois en mesure que nous
auons eu des Roys plus actifs & plus cou-
rageux les vns que les autres, les libertez
vsurpees par les Papes, ont esté tellement
par eux recouuertes, & lesdits Papes tel-
lement reconguez dedans leurs bornes
& limites, qu'au pris des autres pays &
Estats, le nostre a tousiours rapporté ce
tiltre, d'estre nommé pays de liberté, au
lieu des autres pays d'obedience. La pre-
miere & plus notable entreprinse qui se
trouue auoir esté faite par lesdits Papes,
sur la France & libertez d'icelle, fut celle

du temps de Zacharie, lors'que les Seigneurs du Royaume, gaignez par Pepin fils de Martel, ne cherchâs qu'un pretexte tel quel, pour faire ce à quoy en tout cas, ils estoient resolu, demâderent cōseil à ce Pape, fils deuoient deposseder leur Roy legitime, pour sa faineantise & nonchalance, & transferer l'Estat à un plus capable. Car encores qu'en cet acte ce ne fut qu'un conseil demandé, & un masque de liberation de scrupule de conscience emprunté, desquels le refus ou permissiō ne pouuoient rien plus ou moins operer, veu qu'en tout cas, le conseil estoit prins de passer oultre, si est-ce que les Papes (qui visans incessamment à leur grandeur, n'ont iamais rien laissé tomber en terre de ce qu'ils ont estimé pouuoir faire à l'accroissement & amplification d'icelle) prenans cet acte pour un tiltre & possession paisible, commencerent par là à s'en vouloir faire croire pour l'aduenir, & se persuader que ce qui iusques à lors leur auoit esté desnié mesmement en France, qu'ils fussent Euesques vniuersels, & eussent droit d'entreprendre sur

les fonctions des Euesques particuliers, commençoit à leur estre recogneu, en ce qu'on leur accordoit le pouuoir de dispenser & absouldre les François (estans notoirement hors leur diocese de Rome) du serment de fidelité enuers leur Roy. Et ce qui encores esleua lesdits Papes plus haut, fut ce que peu apres le mesme Pepin, & depuis luy, son fils Charlesmagne, se firent oindre, sacrer & couronner par lesdits Papes, non seulement Roys de France & de Lombardie, mais aussi Empereurs d'Occident, apres que Leon Pape eust erigé exprez ledict Empire, & iceluy desmembré d'auec celuy d'Orient: chose toutefois où il auoit aussi peu de pouuoir, qu'à donner lesdits Royaumes de France & de Lombardie, & qui dependoit de la seule force & espee dudit Charles - magne. Mais pour cela lesdits Papes ne laisserent de prendre & conter lesdits actes de possession, pour tiltres probatifs de la toute-puissance, que depuis ils se sont voulu attribuer, de pouuoir eriger, donner & oster les Empires & Royaumes, & de n'y receuoir

que qui bon leur sembleroit, par le moyē de l'onction & coronation, qu'ils ont soustenu dependre d'eux, ou en leur absence des Euesques leurs subiets, sous ombre qu'aucuns de leurs deuanciers, abusans de la deuotion & scrupulosité d'aucuns Roys ou Empereurs, leurs auroient mis en teste, à fin d'estre plus honorez par leurs peuples, & plus soustenuz par la grace de Dieu, de se faire oindre par eux ou par lesdits Euesques, à l'imitation des Roys de Iuda.

Vn autre poinct qui ayda lesdits Papes à empieter bien auant sur la France, furent les donations grandes & immenses, que leur firent les mesmes Roys Pepin & Charlesmagne, & depuis eux Loys Debonnaire, de plusieurs contrees d'Italie, par le moyen desquelles, comme il a esté ia touché cy dessus, ils monterent de plus en plus en vn pouuoir Monarchicq, & s'ehardirent avec la force de leurs armes temporelles, qui deuint par ce moyē redoutable, de desployer plus licentieusement que deuant, & s'escrimer à tort & à trauers de leurs armes spirituelles, com-

me en moins de rien ils firent tres-bien sentir à la posterité, mesmes nosdits Roys qui leur auoient faict ces dons immenses. Ce fut lors que sur l'occasion de plusieurs grands troubles naiz , & qu'eux mesmes susciterent entre les enfans de l'Empereur Charlesmagne, entre Loys Debonnaire & ses enfans, entre Lotaire & ses freres, & entre Loys d'Allemagne & ses cousins, esquels les Euesques & grands du Royaume, se trouuoient enue-lopez & diuisez, les contendans ayans esté contraincts de s'en rapporter ausdicts Papes, comme arbitres, ils prindrent par là peu à peu subiect, de s'enhardir & mettre le nez plus auant, qu'ils n'auoient osé faire par le passé, dans les affaires & negoces de la France, y aller souuent ou y enuoier leurs Legats, pour sous ombre d'y composer les affaires, y souffler le feu de diuision, & sefforcer, bien que tousiours en vain, d'y introduire & autoriser leurs excommunications & interdictiōs. Bref y semerent tellement la zizanie, tāt entre les Princes les vns contre les autres, qu'entre les Roys & leurs subiets,

que peu à peu par les troubles qu'ils susciterent, & l'inondation des Normans qui y furent appelez des vns à l'enuy des autres, cest Estat fust tellement affoibly, qu'outre la barbarie qui se mit avec le temps (vray moyen de disposer les esprits, & les rendre tables rases, pour receuoir telle impression, superstition, & tout ce qui leur eust esté enuoyé de Rome) les Roys deuindrēt si foibles & si bas, qu'il fut aisé ausdits Papes, d'obtenir ce q̃ de long temps ils auoiēt tousiours desseigné, d'arracher hors de leurs mains l'Empire, & le transferer à certains Bozons, Berengers & autres Italiens, qu'ils feroiēt & deferoient comme bon leur sembleroit: empietans & gagnans ce pendant sur la France peu à peu, par le moyen de plusieurs alleees & veniies, qu'ils y faisoient en personnes ou leurs Legats, quelques nouueaux droicts & prerogatiues derogantes aux anciennes libertez, comme entre autres d'enuoyer le *pallium* aux Archeuesques, indire les Conciles en la France, & y presider, sans congé du Prince & de l'Eglise, retracter par appel, les

iugemens donnez és Synodes d'Euesques, entreprendre la confirmation ou consecration des Prelats, iceux preuenir aux collations des benefices, donner dispenses contre les saincts canons, & faire tels autres actes portans entreprinſes, tât sur le ſpirituel que temporel. Mais ce qui plus que nulle autre choſe eſleua le pouuoir exceſſif deſdicts Papes, & eſtabliſt leur Monarchie abſolüe, fut l'occaſion qui ſoffrit à Urbain deuxieſme, en l'an 1095. lequel feſtant à l'exemple de pluſieurs ſes deuanciers retiré en France, comme en ſon aſyle ordinaire, pour ſe reuanger contre l'Empereur Héry troiſieſme, qui l'auoit faiët excommunier en vn Concile d'Allemagne, enſemble contre les traitemens rudes du Senat & peuple de Rome, qui pour lors irritez des mauuaiſes mœurs des Papes, les perſecuroit & dechaffoit, il fut ſollicité par Loys le Gros, fils du Roy Philippes premier, Prince tres-ſage & tres-aiué, d'indire vn Concile vniuerſel en Frâce, & en iceluy, comme il eſtoit Prelat tres-eloquent, exciter la Nobleſſe tant Françoisiſe qu'au-

tres, à se croiser pour la guerre sainte: à fin (car telle estoit l'intention dudit Loys le Gros) que par ces guerres & pellerinages, la France se déchargeast peu à peu d'infinis petits roitelets & tyranneaux, introduits en icelle, & affermis depuis le temps de Charles le simple. Ce que fit le Pape Urbain avec telle efficace, trouuant d'ailleurs l'humeur de la plus part des hommes de ce temps là, disposée à faire ce voyage, qu'il incita non seulement les François, mais quasi toute l'Europe & l'Occident, à passer contre l'Asie & l'Orient: chose qui ayant pour le commencement assez heureusement succédé, esleua les Papes en telle creance & autorité, tant enuers la France, qu'enuers toutes les autres nations de la Chrestienté, qu'outre qu'il leur fit vne planche infailible, pour à l'aduenir, toutes & quantes fois que bon leur sembleroit, pouuoir librement publier des croisades & indulgences, non seulement contre les infideles, mais aussi contre tous Chrestiens qui oseroient opposer à leur grandeur, qu'à ceste seule occasion ils declareroient

declareroient heretiques. Les accidens
 qui d'ailleurs suruindrent encor de ceste
 guerre, leur accreurēt beaucoup pl^r leur
 credit, pource que l'ignorance & la bar-
 barie, qui ordinairement suyuent les grā-
 des guerres, fessant lors de tout poinct
 establiz en la France, & encores dauan-
 tage la superstitiō (qui n'est comme cha-
 cun sçait qu'une peur seruile, de la iustice
 & vindicte diuine) saisissant les cœurs des
 plus scelèrez, cela fut cause que ceste su-
 perstition meslee avec l'ignorance, qui
 f'estoit coulee aux ames de la pluspart de
 ces pellerins retournez de la guerre sain-
 cte, chargez de pechez monstrueux &
 abominables, dont les Leuantins les au-
 roient imbuz, donna beau ieu aux Papes
 de ce temps là, pour ce que les guerriers
 qui estoient toute la Noblesse de France,
 se trouuans confuz de plusieurs grands
 scrupules & inquietudes de conscience, à
 cause de l'enormité desdits pechez, & à
 ceste occasion tombez en la mesme an-
 xieté, que les malades de maladies incu-
 rables, qui n'estimans les medecines or-
 dinaires assez suffisantes pour les pouoir

guairir & sauuer, ont recours aux extraordinaires, c'est à dire n'estimās les penitēces, prieres & propitiations ordinaires, assez fortes pour lauer l'horreur de leursdits pechez, ils se laisserent aisement persuader & induire, à chercher des nouueaux & plus expres remedes que les ordinaires, puisiez de ce qu'on a depuis appelle la plenitude des thresors de l'Eglise, d'indulgences, pardons & planieres remissions venans de Rome, avec dispenses de plusieurs grands voeus difficiles, voire impossibles, auxquels la pluspart d'eux festoient obligez & astraits, pour cūider effacer l'enormité de leurs fautes. Occasions lesquelles les Papes embrasans auidement, & imitans les mauuais medecins, qui se font donner par leurs malades, lors qu'ils sont au fort de leur mal, frēt, comme on dit, en baillant baillant, c'est à dire en eschange de toutes ses graces spirituelles & indulgences, dont ils se voioiēt si auidement recherchez, & qu'ils n'oublierent de faire valoir, ils obtindrent des Roys, Princes & Seigneurs Chrestiens, de tres-grands dons & auan-

tages, *pareatis*, autoritez, tiltres & actes
 approbatifs de leur puissance absolüe.
 Mais comme c'est chose qui iamais ne
 fault, qu'un abisme attire tousiours l'au-
 tre, c'est à dire un desordre d'autres de-
 sordres, ils abuserent si licentieusement
 de ce trop grand & effrené pouuoir, &
 introduisirent tant d'abuz & de diffor-
 mations en l'Eglise, que les plus infirmes
 commencerent à s'en scandaliser peu à
 peu, mesmement de ce que toutes choses
 tant sacrees que prophanes estoient ve-
 nales, & de ce qu'on voyoit les vicaires
 de Iesus-christ, plus souuent armez ou en-
 uironnez de Satrapes, qu'en l'estat & for-
 me des successeurs de saint Pierre: chose
 qui fit aheurter plusieurs contre la pierre
 d'offence & de scandale, & douter pour
 le commencement de leur puissance, &
 puis pied à pied de la doctrine qu'ils pres-
 choient, tellement qu'ils deuindrent par
 succession de temps, Albigeois, Vaudois,
 Pauures de Lyon, Arnoldistes, Patariens,
 Turlupins & d'autres sectes & opinions
 semblables. Ce malheur deuoit estre un
 enseignement suffisant aux Papes, pour

les faire r'entrer en leur ancienne modestie & saincteté, & rechercher les remedes ordinaires dont auoit vſé la primitive Eglise, pour extirper les heresies : c'estoit d'indire des Conciles, pour y confuter les opinions faulces, par le glaive tréchant de la parole de Dieu, & par mesme moyen ôster les pierres de scandale, & la difformation des mœurs des Ecclesiastiques. Mais telle n'estoit leur intention: car iettans au loing tels remedes Angeliques & du sainct Esprit, ou pour le moins n'en vſans que par sainte & mines, pource qu'ils ne craignoient rien tant que la réformation, ils eurent recours aux remedes mondains, c'est à dire aux espees, cousteaux & feux. Ceste croisade qui auoit esté inuentee du commencement, pour mettre la Chrestienté en repos, & ietter la rage des gens de guerre de l'Europe sur l'Orient & le Paganisme, ils la mirent en ieu pour ceste fois là, à fin, disoiēt ils, de ruiner l'heresie: mais en effect pour maintenir & augmenter leur puissance & grandeur. Ils armerent donc par le moyen d'icelle, toutes sortes de

personnes contre ces Albigeois heretiques, lesquelles remplirent le Languedoc & les frontieres d'Espagne, de feu, de sang & de desolation, n'espargnans hommes, femmes & petits enfans, & aussi peu les innocens que les coupables, perdans les ames avec les corps, faisans mourir sans confession & repentance plusieurs, dont la pluspart eussent esté facilement conuertis, si on eust voulu tant soit peu prendre peine d'y appliquer les bons & legitimes remedes.

Mais à fin de n'entrer plus auant aux abuz, defformitez & desordres qui se sont coulez en l'Eglise de Dieu, par les mauuais deportemens des principaux ministres d'icelle, & qui ont causé toutes les heresies, dont la Chrestienté a esté affligee, depuis trois ou quatre cens ans continuellement, la souuenance desquels ne peut apporter qu'un creue-cœur à tous les bons & vrais Catholiques, ie me contenteray retournant à mon premier propos, de dire que combien que les Papes par les moiens dessusdits, aient beaucoup entrepris sur les libertéz de l'Egli-

se Gallicane, & sur les droicts de noz Roys, toute fois ils sont tousiours demeurez en ceste possession, de faire assembler le Clergé de France, toutes les fois que bon leur a semblé, pour auiser à la police & discipline Ecclesiastique: en possession eux & leurs Parlemens, de faire des loix, statuts, ordonnances, reglemens & arrests, touchant les choses Ecclesiastiques, & principalemēt pour refrener les abus, excez, maluersations & entreprinſes, tant des Prelats & autres personnes du Clergé, que des Papes. Et de faict le volume des ordonnances Royaux, le liure du Stile de Parlement, & les anciens registres de la Cour, sont pleins desdites loix. Toutes les fois que les Estats generaux de la France ont esté assemblez, le Clergé cōme les deux autres Estats, a baillé vn caier de remonstrances, sur lequel les Roys ont faict des ordonnances pour la police & discipline Ecclesiastique. Saint Loys, oultre sa pragmatique, fit vne loy, par laquelle il ordonna que tous Euesques, patrons & autres collateurs, ne seroient empeschez par le Pape, en la plei-

*Stil. de
Parl. par.
3. tilt. 3.
art. 1.*

ne iouissance de leurs droicts , & qu'a
 chacun sa iurisdiction seroit gardee:& fit
 encores vne autre loy contre les Simo-
 niaques. Philippes le Bel par sa Philippi-
 ne,deffendit l'exaction de nouuelles dis-
 mes. Charles cinquiesme,comme nous
 auons cy deuant remarqué, fit composer
 le songe du Verger contre l'ambition des
 Papes , & deffendit aux Euesques & à
 leurs Officiaux,d'excommunier les villes
 & cōmunautéz de son Royaume. Char-
 les sixiesme en l'an 1365. chassa les col-
 lecteurs des Papes , deffendit les benefi-
 ces estre conferez aux estrangers , & fit
 saisir les benefices possédez par les Car-
 dinaux,& autres demeurans hors le Roy-
 aume. Il fit bien plus:car il fosta , & pa-
 reillement son Royaume de l'obeissance
 du Pape . Le Pape Martin cinquiesme,
 ayant esté esleu au Concile de Constan-
 ce,après la dépositiō de trois Papes, vou-
 lut remettre en vsage les reseruatiōs &
 autres impositions sur les Eglises de Frā-
 ce : pour à quoy obuier,à la postulation
 des trois Estats tenuz à Paris , les anciens
 Edits contre les vsurpations des Papes

stil.part.
3. tilt. 3.
art. 9.

stil. p. 3.
tit. 3. art.
1.

stil.part.
3. tilt. 37.
art. 1.

furent renouvellez , & par arrest du Parlement donné en l'an 1418. fut dit qu'ils seroient signifiez audit Martin cinquiesme, auant qu'on luy fit l'obedience, que les Roys ont accoustumé enuoier faire aux nouveaux Papes, lequel Pape Martin à ceste occasion, aiant interdit la ville de Lyon par autre arrest de l'an 1422. fut l'interdit déclaré nul & abusif. Charles septiesme l'an 1437. deffendit à tous les Prelats du Royaume d'aller à Ferrare, où ils estoient citez par Eugene quatriesme, successeur de Martin cinquiesme. En l'annee ensuiuant il ordonna la pragmatique sanction à Bourges, contre les annates, reseruatiens & inuentions des Papes, il deffendit receuoir, publier ny executer aucunes bulles de citations, preuētiōs ou censures de Rome, sur peine de crime de leze Maiesté. Loys vnziesme l'an 1464. deffendit d'enuoyer ou porter argent à Rome, ny en apporter aucunes bulles : lesquels Edits il renouela l'an 1478. comme long temps auparauant auoit faict Philippes le Bel : & mit des gardes aux passages. Le Roy Loys 12.
aiant

aiant esté chassé d'Italie, par les menees, factiōs & armes ouuertes de Iules deuxiesme, il le fit suspendre de son Papat, par le Concile tenu à Lyon: en haine dequoy ledit Iules l'excommunia, & tous les François, & dōna son Royaume en proie, & celuy de Nauarre au premier conquérant, & oultre decerna bulles de remissiō planiere & indulgences, à ceux qui tue-roient vn François.

Parce que dessus donc, il me semble auoir assez clairement prouué & montré, que noz Roys ont droict, non seulement de faire quand il leur plaist, assembler les Euesques, Prelats, & autres Ecclesiastiques de ce Royaume, tant pour auiser & pouruoir à la discipline Ecclesiastique, que pour remedier aux desordres qui y pourroient aduenir, par le moyen des entreprinſes & vsurpations des Papes, mais aussi d'y pouruoir eux mesmes, & d'y faire pouruoir par leurs Parlemens, & principalement par celuy de Paris, maintenant transferé à Tours, lequel outre l'exercice ordinaire de la iustice, auquel il est assiduellement occu-

pé, ayant esté estably par nosdits Roys, pour maintenir & conseruer les droicts de leur Coronne, il sy est tousiours si virilement & vertueusement employé, qu'il a toutes les fois que les occasions sy sont presentees, repoussé les violences & entreprinſes des Papes, sans craindre leurs vaines & iniustes excommunications, desquelles ils se sont tousiours tres-bien sçeu garentir, & en ont garenty nosdits Roys & leurs subiets, tant par le moyen de l'appel, come d'abus, qu'un des grands personnages de ce Royaume appelloit le *palladium* de la France, que par autres moyens & remedes iustes & legitimes.

Or ie ne doute point qu'ayant esté cōtraint en ce discours, pour la iuste deffenſe de nostre Roy, & de nous, dire beaucoup de choses, qui ne seront aucunemēt agreables à ceux qui sont plus affectionnez aux Papes & à leur grandeur & puissance extraordinaire, qu'au bien & à la conseruation de cest Estat & de nostre Roy, ie ne sois par eux blasmé & accusé, d'auoir porté trop peu d'honneur & de respect au saint ſiege Apostolic, & d'a-

uoir à l'exemple de Cham, fils de Noé, descouuert les parties honteuses de noz peres communs. Mais à cela ie leur respondray, que ie ne manqueray iamais de leur porter tout l'honneur, respect & obeissance que ie leur doy, *clauē non errante*, les recognoissant pour directeurs, surueillans & superintendans de l'Eglise Catholique, & proteste que ce que i'ay dit, n'a point esté pour descouurer leurs imperfections: car si elles eussent esté cachées, i'eusse encore aydé de tout mon pouuoir à les cacher dauantage. Et neantmoins i'ay apprins dans noz constitutiōs canoniques, *Que tout ainsi que c'est chose louable & discrete, de porter honneur & reuerence à ses superieurs, aussi est il de la iustice & de la crainte de Dieu, ne dissimuler aucunement ce qu'on voit en eux subiet à correction, de peur que tout le corps ne se consume de maladie, si on neglige la langueur qui est en la teste. Et que nous ne deuons nous rendre plus subiets que de raison à noz superieurs, de peur que nous assubiētissans trop à eux, nous ne soyons contraints de reuerer leurs vices.* Gerbert en l'Epistre qui a esté

*ca. sicut
laudabi-
le, &
can. ad-
monendi
2. qu. 7.*

cy dessus alleguee, dit que si le Pape peche souuent & ne s'amende point, qu'il faut le tenir comme vn Ethnique & publicain:& Balde sur le chap. *olim de rescriptis*, dit que contre le Pape abusant, il faut premierement vser de paroles, secondement d'herbes, tiercement de pierres & de force.

Lors donc que Gregoire quatorzieme voudra recognoistre & amender sa faute, se departant des ligues, confederations & associations faites avec le Roy d'Espagne, les subiets rebelles, & autres ennemis de cest Estat, & reuoquant les armées qu'il a enuoies en France, pour la ruine de ce Royaume, de nostre Roy, & de ses bons subiets, lors qu'il se rendra nostre pere commun, & nous daignera recognoistre pour ses enfans, non seulement moy, mais comme ie me puis promettre, tous les bons, vrais Catholiques & fideles François, luy rendrons tout l'honneur, reuerence, subiection & obeissance que nous luy deuons.

F I N.

Fautes suruenües en l'impression.

Page 9. ligne 18. lisez *Vox Iacob, manus autem Esaii.* pa. 30. li. 10. pour voir. pa. 41. li. 1. elles s'estoient li. 12. ceste notorieté pa. 45. li. 6. No-
uatiens. pa. 60. li. 19. & 22. & pa. 61. li. 4. & 10. au
lieu d'Amurat lisez Baiazeth. pa. 61. li. 22. Gre-
goire XIII. pa. 72. li. 18. iniques. pa. 79. li. 1.
deference. pa. 81. li. 12. les loix.

1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900



